



河間府志卷之十四

人物

志曰瀛居燕趙間人仰慷慨餘風耳及按史傳漢晉  
以來忠節輩出大儒林立不獨鮑劉韓董昭然耳  
目間也何其盛與或者河間獻王集諸儒興禮樂  
而毛董諸公廣教澤授生徒經術昌明故相因蔚  
起耶舊志以類分載行事甚詳今稍節之總以世  
代部便人觀覽至于典型具在樹立在人士生斯  
世鹿鹿無所表見卒致姓氏不彰與烟草俱泯沒





也亦良可嘆悼矣後之披是籍者尚思所以致身不朽也哉

周 澹臺滅明 字子羽武城人今故城縣澹村其故居也

扁鵲 鄭人也姓秦氏名越人少時爲人舍長舍客長桑君過扁鵲獨奇之常謹遇之長桑君亦知扁鵲非常人也出入十餘年乃呼扁鵲私坐間與語曰我有禁方年老欲傳與公公母泄扁鵲曰敬諾

乃出其懷中藥予扁鵲飲以上池之水三十日當知物矣乃悉取其禁方書盡與扁鵲忽然不見殆非人也扁鵲以其言飲藥三十日視見垣一方人以此視病盡見五臟癥結特以診脉爲名耳爲醫或在齊或在趙著名扁鵲名聞天下過邯鄲聞貴婦人卽爲帶下醫過洛陽聞周人愛老人卽爲耳目痺醫來入咸陽聞秦人愛小兒卽爲小兒醫隨俗爲變秦太醫令李醢自知伎不如扁鵲也使人刺殺之



孫臏 齊人也與龐涓俱學兵法龐既事魏為將軍  
 自以能不及臏乃陰使召之臏至龐以刑法斷其  
 兩足而黔之齊使者如梁臏以刑徒陰見說齊使  
 齊使以為奇竊載與之齊齊將田忌善而客待之  
 進于威王王問兵法遂以為師其後魏伐趙急趙  
 請救于齊齊威王以田忌為將孫子為師居輜車  
 中坐為計謀田忌欲引兵之趙孫子曰君不若引  
 兵疾走大梁彼必釋趙而自救田忌從之魏果去  
 邯鄲與齊戰于桂陵大破梁軍後十五年魏與趙

攻韓韓告急于齊齊使田忌將而往直走大梁涓  
 聞之去韓而歸齊軍已過而西矣孫子教田忌為  
 減竈之法涓果喜曰吾固知齊軍怯入吾境三日  
 亾者過半矣乃與輕銳倍日併行逐之孫子度其  
 暮當至馬陵道狹多阻可伏兵乃書大樹曰龐涓  
 死此樹下于是令萬弩夾道而伏期日暮見火舉  
 而發涓果夜至見白書鑽火燭之萬弩俱發涓自  
 剄孫臏以此名顯天下

按吳橋係齊地今  
 尚有墓與廟在焉

漢



城子州

海國府志

卷之十四

八

董仲舒 廣川人也少治春秋孝景時博士下帷講  
誦弟子以次相授業或莫見其面蓋三年不窺園  
其精如此進退容止非禮不行學士皆師尊之武  
帝卽位舉賢良文學之士前後百數而仲舒以賢  
良對策天子以爲江都相事易王易王帝兄素驕  
好勇仲舒以禮誼匡王王敬重焉自武帝初立魏  
其武安侯爲相而隆儒矣及仲舒對策推明孔氏  
抑黜百家立學校之官州郡舉茂材孝廉皆自仲  
舒發之年老以壽終於家家徙茂陵子及孫皆以

學至大官

吾丘壽王 字子贛趙人也年少以善格五名待詔  
使從中大夫董仲舒受春秋高材通明遷爲侍中  
中郎汾陰得寶鼎武帝嘉之薦見宗廟藏於甘泉

宮壽王獨曰非周鼎

今任丘有壽王讀書臺

竇嬰 字王孫孝文后從兄也孝景初以得罪竇太  
后不得入朝請三年吳楚反乃召嬰入見固謝  
病太后亦慚於是上曰天下方有急王孫寧可讓  
耶乃拜嬰爲大將軍嬰乃言袁盎樂布諸名將賢

河間府志

卷之十四

漢人物

四



海陽府志 卷之十四  
士皆進之既盡破七國兵封竇爲魏其侯

雋不疑 字曼倩渤海人也治春秋爲郡文學進退

必以禮名聞州郡武帝末郡國盜賊羣起暴勝之  
爲直指使者衣繡衣持斧逐捕盜賊督課郡國東  
至海以軍興誅不從命者威振州郡勝之素聞不  
疑賢至渤海遣吏請與相見不疑冠進賢冠帶櫛  
具劍佩環玦褒衣博帶盛服至門上謁門下欲使  
解劍不疑曰劍者君子武備所以衛身不可解請  
退吏白勝之勝之開閣延請望見不疑容貌尊嚴

衣冠甚偉躡履起迎登堂坐定不疑據地曰竊伏  
海濱聞暴公子名舊矣今乃承顏接辭凡爲吏太  
剛則折太柔則廢威行施之以恩然後樹功揚名  
永終天祿勝之知不疑非庸人敬納其戒深接以  
禮意

鮑宣 字子都渤海高城人也好學明經爲諫大夫  
是時董賢貴幸宣上書切諫上以宣名儒優容之  
宣爲司隸時坐拒閉使者下廷尉獄博士弟子濟  
南王咸舉幡太學下欲救鮑司隸者會此下諸生



會者千餘人遂抵宣罪減死一等髡鉗宣既被刑乃徙之上黨遂家於長子王莽秉政誅諸豪傑及漢忠臣不附已者宣及何武等皆死至世祖卽位徵鮑宣子孫皆見褒表

鮑永 字君長宣之子仕至兗州牧事後母至孝妻偶於母前叱狗永卽出其妻

鮑昱 字文泉永之子也仕至太尉宣三世俱爲司隸乘驄馬京師歌曰鮑氏驄三入司隸再入公

劉輔 河間宗室也舉孝廉爲襄賁令上書言得失

召見上美其材擢爲諫大夫會成帝欲立趙婕妤爲皇后輔上書諫上使縛輔繫掖庭秘獄羣臣莫知其故於是中朝左將軍辛慶忌右將軍廉褒光祿勳師丹太中大夫谷永俱上書諫上廼徙繫輔共工獄減死罪一等論爲鬼薪終於家

巴肅 字恭祖渤海高城人也初舉孝廉辟公府稍遷拜議郎與竇武陳蕃等謀誅閹宦武等遇害肅亦坐黨禁錮中常侍曹節後聞其謀收之肅自載詣縣縣令見肅入閣解印綬與俱去肅曰爲人臣



者有謀不敢隱有罪不逃刑既不隱其謀矣又敢  
逃其刑乎遂被害刺史賈琮刊石立銘以記之

劉淑 字仲承河間樂城人也祖父稱司隸校尉淑  
少好學明五經隱居立精舍講授諸生常數百人  
州郡禮請五府連辟並不就桓帝聞淑高名切責  
州郡使輿病即詣京師淑不得已赴洛陽對策爲  
天下第一拜議郎後再遷侍中虎賁中郎將上疏  
以爲宜罷宦官辭甚切直帝雖不能用亦不罪焉  
靈帝卽位宦者奏淑與竇武等通謀下獄自殺

公孫進階 渤海人與扶風魏齊卿並危言深論不  
隱豪強自公卿以下莫不畏其貶議屣屨到門

苑康 字仲真渤海重合人也少受業太學與郭林  
宗親善舉孝廉再遷潁陰令有能迹遷泰山太守  
郡內豪雄多不法康至奮威怒施令莫有干犯者  
先所請奪人田宅皆遽還之是時山陽張儉殺常  
侍侯覽母案其宗黨賓客或有逃匿泰山界者康  
既常疾闒官因此皆窮相收掩無得遺脫覽大怨  
之誣康與兗州刺史第五種及都尉壺嘉詐上賊



降徵康詣廷尉獄減死罪一等徙日南頽陰人及  
泰山羊陟等詣闕為訟乃原還本郡卒於家

○王調 渤海人將軍梁冀誣李固傳文為妖言下囹獄

調固門上書証固之枉自械闕下請代固死固

由是得免京師皆呼萬歲冀大驚竟持前奏害固

天下免之

李善 字次孫渤海李元蒼頭也建武中元家相繼

疫死有孤續生纔數旬而貲財千萬諸奴婢垂涎

甚欲殺續善深傷李氏而力不能制乃潛負續逃

出隱山陽瑕丘界中親自哺養乳為生潼避燥就

濕備嘗艱勤續年十歲善與修理舊業告諸奴婢

於長吏悉收殺之時鍾離意薦善行狀光武詔拜

善及續並為太子舍人顯宗時善遷九江太守續

至河間相

周澤 北海人北海即渤海與琅琊承宮並海內大

儒永平元年長水校尉樊儵皆以為師友而致之

於朝上言郡國取孝廉率取年少能報恩者耆宿

大賢多見廢棄宜勅郡國簡用良俊顯宗從之



韓嬰 燕人也孝文時嬰為博士景帝時為長沙王

太傅嬰推詩人之意而作內外傳數萬其語頗與

齊魯間殊然其歸一也淮南賁生受之燕趙間言

詩者由韓意意亦以易授人推易意而為之傳燕

趙間好詩故其意微惟韓氏自傳之武帝時嬰與

董仲舒論於上前其人精悍處事分明仲舒不能

難也 今其墓在任丘

孟但 廣川人元光中徵為太子門下大夫以易至

大官其言易本之田何

殷忠 廣川人董仲舒之弟子治春秋

段仲溫 廣川人與殷忠俱師事董仲舒卒之名位

又同郡呂步舒從胡毋生治公羊春秋

趙定 渤海人以丞相魏相奏言知音善鼓琴召見

待詔

毛萇 六藝論云河間獻王好學其博士毛公善說

詩獻王號之曰毛詩漢書儒林傳云毛公趙人也

為河間獻王博士不言其名范曄後漢書云趙人

毛萇傳詩是為毛詩然則趙人毛公名為萇也譜



云魯人大毛公為訓詁傳於其家河間獻王得而獻之以小毛公為博士邑誌云城西北三十里尊福鄉有詩經村即毛公設教處元至正間總管呂思誠奏建毛公書院設山長祀之今其墓在三十里鋪北道西名毛精壘有司及士人建祠祀之

又見

劉植 字伯先昌城人也王郎兵起植與弟喜從兄

歆率宗黨賓客聚兵數千據昌城聞世祖至乃開門迎世祖以植為驍騎將軍時真定王劉揚兵起

以附王郎眾十餘萬世祖遣植說揚揚降建武二年封為昌城侯討密縣賊戰歆

劉喜 植之弟也起兵迎光武為偏將軍及植卒帝使喜代為驍騎將軍征討有功封觀津侯

劉歆 植之從兄也與弟植起兵迎光武為偏將軍弟喜卒復以為驍騎將軍從征有功封淳陽侯

東漢

劉儵 河間人桓帝時為侍御史帝崩竇武召儵問河間宗室之賢者儵稱孝王曾孫宏武白太后定



策禁中以儵守光祿大夫持節奉迎入卽位是爲  
靈帝拜儵侍中後與陳蕃謀誅宦者不克而死第  
東郤自大鴻臚拜司徒少府陳球嘗說郤曰公出自  
宗室位登台鼎豈得雷同依違而已今宦者曹節  
等復縱爲害可表徙衛陽球爲司隸校尉以次收  
節等誅之政出聖主天下太平可翹足而待也尚  
書劉納亦以爲言郤許諾會節等聞之共白帝曰  
郤等交通謀議不軌帝大怒收郤與球納皆下獄  
死兄弟俱死於義人以爲難

趙苞 字威豪甘陵東武城人從兄忠爲中常侍苞  
深恥其門族宦官名誓不與忠交通初仕州郡舉  
孝廉再遷廣陵令視事三年政教清明郡表其狀  
遷遼西太守抗厲威嚴名振邊俗以到官明年遣  
使迎母及妻於垂當到郡道經柳城值鮮卑萬餘  
人入塞寇鈔苞母及妻子遂爲所劫質載以擊郡  
苞率步騎二萬與賊對陣賊出母以示苞苞悲號  
謂母曰爲子無狀欲以微祿奉養朝夕不圖爲母  
作禍昔爲母子今爲王臣義不得顧私恩毀忠節



惟當萬死無以塞罪母遙謂曰威豪人各有命何得相顧以虧忠義昔王陵母對漢使伏劍以固其志爾其勉之苞卽時進戰賊悉摧破其母妻皆爲所害苞殞殮母畢自陳歸葬靈帝遣策吊慰封郟侯苞葬訖謂鄉人曰食祿而避難非忠也殺母以全義非孝也如有何面目立於天下遂嘔血而死

張敏 字伯達河間鄭人也建初二年舉孝廉四遷

五年爲尚書建初中有人侮辱人父者而其子殺

之章帝免其死刑而降宥之自後因以爲比是後遂定其議以爲輕侮法敏駁其議和帝從之九年拜司隸校尉視事二歲遷汝南太守清約不繁用刑平正有理能名坐事免延平元年拜議郎再遷潁川太守徵拜司空在位奉法而已三歲以病乞身不聽六年春行大射禮陪位頓仆乃策罷之因病篤卒於家

李雲 字行祖甘陵人也性好學善陰陽初舉孝廉再遷白馬令桓帝延熹元年誅大將軍梁冀而中



常侍單超等五人皆以誅冀功並封列侯專權選  
舉又立掖庭民女亳氏爲皇后數月間后家封者  
四人賞賜鉅萬是時地震裂衆災頻降雲素剛  
憂國將危心不能忍乃露布上書移副三府帝得  
奏震怒下有司逮雲詔尚書都護劍戟送黃門北  
寺獄使中常侍管霸與御史廷尉雜考之時弘農  
五官掾杜衆傷雲以忠諫獲罪上書願與雲同日  
死帝愈怒遂并下廷尉大鴻臚陳蕃上疏救雲曰  
李雲所言雖不識禁忌干上逆旨其意歸於忠國  
而已雲衆皆死獄中

賈伯錡 河間人河北名士也

周福 字仲進甘陵人桓帝爲蠡吾侯嘗受學焉及  
帝即位擢福爲尚書時同郡河南尹房植有名當  
朝鄉人爲之謠曰天下規矩房伯武因師獲印周  
仲進二家賓客互相譏揣各樹朋徒漸成尤隙由  
是甘陵有南北部黨人之議自此始矣

夏方 字伯陽甘陵人

公沙穆 樂城人善河洛推步之術仕至弘農令



鮑靛 渤海人明天文河洛數舉南陽太守入海遇  
風波飢甚取白石煮食活百餘歲後不知所之

王早 南皮人明陰陽九宮九兵法善風角嘗有卒  
風振樹語人曰日中有千里外急使召我如期果  
然如此者尤衆

張超 河間人以草書擅名與弘農張伯英同時競  
秀爲人博學愛士從破黃巾有功

魏 邢顒 字子昂河間鄭人也舉孝廉司徒辟皆不  
就易姓字適右北平從田疇游後見曹操求爲鄉

導以克柳城時人稱之曰德行堂堂邢子昂遂舉  
爲平原侯植家丞顒防閑以禮由是不合庶子劉  
楨書諫將謂君侯習近不肖禮賢不足採庶子之  
春華忘家丞之秋實爲上招謗其罪不小

張郃 字雋父河間鄭人也漢末應募討黃巾爲軍  
司馬佐韓馥馥敗以兵歸袁紹曹操與袁紹相拒  
於官渡郃說紹曰曹公兵精往必破瓊等瓊等破  
則將軍事去矣宜急引兵救之紹但遣輕騎救瓊  
而以重兵攻魏武營不能下果破瓊等紹軍潰郃



歸魏武拜征西車騎將軍郤識變數善處營陣料戰勢地形無不如計諸葛亮復出祁山詔郤督諸將西至略陽亮還保祁山追至木門與亮軍交戰飛矢中郤右膝薨謚曰壯侯子雄嗣

王修 曹操引兵攻袁譚於南皮修時運糧在樂安聞譚急將所領兵及諸從事數十人往赴譚至高密聞譚死下馬號哭曰無君焉歸遂詣操乞收葬譚屍操欲觀修意默然不應修復曰受袁氏厚恩若得收殮譚屍然後就戮無所恨操嘉其義遂聽

之

吳質 南皮人居燕友臺與文帝相欵

詳見宦蹟

邢喬 字曾伯顓曾孫有體量局幹美於當世歷元

康中與劉缺俱爲尚書吏部郎稍遷至司隸校尉畢湛 鄭人經明行修將軍張郃薦之詔曰昔祭遵

爲將奏置五經大夫居軍中與諸生雅歌投壺今將軍外勤戎旅內存朝政朕嘉將軍之意擢爲

晉

石苞 字仲容南皮人也雅曠有智局容儀偉麗不

南皮



秦使亦人以苞反

見許久亦為小和久

知已必決其反

修小節惟陽翟郭元信沛國趙元儒器重之累功  
進位征東大將軍遷驃騎將軍武帝踐祚遷大司  
馬進封樂陵郡公謚曰武有六子越喬統浚雋崇  
以統為嗣統字弘緒曾孫樸為人謹厚無他才沒  
於胡石勒以同姓俱出河北引為宗室特加優寵  
位至司徒

高瞻 字子前蓆人也少而英爽有俊才身長八尺  
二寸光熙中調補尚書郎屬永嘉之亂還鄉里  
封孚 懿之兄燕舊臣也晉安帝隆安三年南燕王

慕容德陷廣固都幽州進據琅琊徐兗之民歸附  
者十餘萬孚聞德至出降德大喜曰孤得青州不  
為喜喜得卿耳遂委以機密德卒太子超立引所  
親公孫五樓為心腹德故大臣北地王鍾段宏等  
皆不自安求補外職孚諫曰臣聞親不處外羈不  
處內鐘宏出藩五樓內輔臣竊未安超不從

高祐 字子集允之從祖弟滄水公謹之子也幼涉  
經史好文字仕魏累官中書侍郎孝文嘗問祐比  
水旱不調何以弭災祐曰旌賢佐政則災消穰至



矣又問止盜之方曰守宰貞良則盜自止矣又上  
言選舉不采職政之優劣專簡年勞之多少非盡  
才之謂宜棄彼朽勞唯才是舉凡勲舊之臣年勞  
可錄而才非撫人者則可加以爵賞不宜委以方  
任所謂王者可私人以財不可私人以官者也帝  
皆善之官至光祿大夫祐子產字神寶好學善屬  
文少時作孤蓬賦爲時所稱除著作郎歷中書侍  
郎

封偉伯

字君良博學有才思弱冠除太學博士每

朝廷大議偉伯參焉雅爲太保崔光僕射游肇所  
知賞太尉清河王懌辟參軍事懌親爲孝經解注  
命偉伯爲難劄九條皆發起隱漏偉伯又討論禮  
傳詩易疑事數十條儒者或稱之時朝廷將經始  
明堂廣集儒學議其制度九五之論久而不定偉  
乃搜檢經緯上明堂圖說六卷又撰封氏本傳六  
卷後尚書僕射蕭寶夤爲關西行臺引爲行臺郎  
及寶夤爲逆偉伯與南平王潛結關中豪右韋子  
粲等謀舉入兵事發見殺永安中贈瀛州刺史聽



一子出身無子轉授弟翼翼弟述

刁協 字元亮渤海人廡曾祖也協少好經籍博聞強記釋褐累官鎮東軍長史元帝初拜尚書左僕射時南渡初朝廷草創憲章未立協諸練舊章凡所制度皆出於協太興初遷尚書令協每崇上抑下故爲王氏所憾及王敦構逆上疏罪協帝使協出督六軍至江東遇害後李定蔡謨上書庾冰請加褒典乃復官祀以太牢子彝少遭家難王敦誅後彝斬讐黨以首祭父墓朝廷宥之累官兗州刺史

史

歐陽建 字堅石世爲冀方右族才藻美瞻擅各北州時人爲之語曰渤海赫赫歐陽堅石辟公府歷山陽令尚書郎馮翊太守甚得時譽及遇禍莫不悼惜年三十餘臨命作詩文甚哀楚其兄子質南奔長沙質十二世後生珣珣生通仕於唐皆爲長沙歐陽而猶以渤海爲封望自通又三世生琮琮爲青州刺史子孫家焉

石璞 渤海人晉成帝咸康二年與中書令劉羣河



東裴憲榮陽鄭係潁川荀綽北海傅暢皆見禮擢  
用俱至大官云

劉原 渤海人爲河東太守好奇以旌才爲務同郡  
馮收試經爲郎收年七十餘薦河東猗氏王接於  
原曰夫驛驢不總轡則非造父之肆明月不流光  
則非隨侯之掌伏惟明府包黃中之德耀重離之  
明求賢與能小無遺錯是以鄙老思獻所知竊見  
處士王接岐嶷俊異十二而孤居喪盡禮學過目  
而知義觸類而長斯玉鉉之妙味經世之徽猷也

不患元黎之不啓竊樂春英之及時原卽禮命接  
不受原乃呼見曰君欲慕肥遯之高邪對曰接薄  
植少孤而無兄弟母疾篤故無心爲吏

封抽封奕 渤海人慕容廆建武初晉元帝承制拜

龍驤將軍大單于廆刑政修明虛懷引納流亾士  
庶多襁負歸之於是推舉賢才委以庶政以河東  
裴嶷等三人爲謀士以北海逢羨渤海封抽等六  
人爲股肱以渤海封奕等四人文章才雋任居樞  
要以會州左車等三人舊德清重引爲賓客以平



原劉讚儒學該通引爲東庠祭酒其世子皝率國  
胄束修受業焉廡覽政之暇親臨聽之

木華 字元虛廣川人爲楊駿府主簿韞籍宏博嘗  
爲海賦至今傳之

石崇 字季倫生於青州故小名齊奴少敏惠勇而  
有謀苞臨終分財與諸子獨不及崇其母以爲言  
苞曰此兒雖少後自能得年二十餘爲修武令有  
能名人爲散騎郎遷城陽太守伐吳有功封安陽  
鄉侯在郡雖有職務好學不倦

孟觀 字叔時東光人少好讀書解大意惠帝卽位  
稍遷殿中中郎賈后悖婦姑之禮陰欲誅楊駿而  
廢太后因駿專權數言之於帝又使人諷觀會楚  
王瑋將討駿觀受賈后旨頗加誣其事及駿誅以  
觀爲黃門侍郎特給親信四十人遷積弩將軍封  
上谷郡公氏羗帥衆反於關中衆數十萬諸將覆  
敗相繼中書令陳準監張華以觀沉毅有文武林  
用啓觀討之觀所領宿衛兵皆趨捷勇悍并統關  
中士卒當矢石大戰數十皆破之生擒五百威



惛氏羌轉東羌校尉徵拜右將軍趙王倫篡位以觀所在著績署爲安南將軍監河北諸軍事假節屯宛觀子平爲淮南王允前鋒將軍討倫戰死孫秀以觀伏兵在外假言爲允兵所害贈積弩將軍以安觀義軍旣起多勸觀應齊王冏觀以紫宮帝座無他變謂倫應之遂不從衆議而爲倫守及帝反正永饒治令相機斬觀首傳於洛陽

張方 河間人也世貧賤以材勇得幸於河間王顒累遷兼振武將軍永寧中顒表討齊王冏遣方領

兵二萬爲前鋒及冏被長沙王又所殺顒及成都王穎復表討又遣方自函谷入屯河南惠帝遣左將軍皇甫商拒之方以潛衆破商之衆遂入城

高肇 字守文條人文昭皇太后之兄也五世祖顧晉永嘉中避亂入高麗父颺字法修孝文初與弟乘信入魏拜厲威將軍河間子乘信明威將軍俱待以客禮遂納颺女是爲文昭皇后生宣武颺卒景明初宣武追思舅氏徵肇兄弟等錄尚書事北海王祥等奏颺宣贈左光祿大夫賜爵渤海公謚



曰敬詔可又詔颺嫡孫猛襲渤海公爵封肇平原郡公肇弟顯澄任城郡公三人同日受封數日之間富貴赫奕旋以肇爲尚書右僕射冀州大中王尚宣武姑高平公主遷尚書令後高陽王雍清河王懌任城王澄及諸王等遣壯士搯而拉殺之明帝下詔暴其罪惡稱爲自盡餘無所問歸其尸於家

高聰 字僧智渤海人涉獵經史頗有文才族祖允視之若孫大加賜給數稱其美言之朝廷由是與

蔣少游同拜中書博士轉侍郎爲高陽王雍友稍爲孝文知賞太和十七年兼員外散騎常侍孝文銳意南討假聰輔國將軍受王肅節度同援渦陽聰敗孝文怒死徙平州行屆瀛州刺史王質獲白兔將獻託聰爲表帝見表顧王肅曰在下那得有此才令朕不知肅曰此高聰北徙或其所製帝悟曰必應然也宣武親政除給事黃門侍郎後加散騎常侍後以附高肇出爲并州刺史卒贈青州刺史謚曰獻



後魏

高顥 字門賢和璧子學涉古今有時譽襲爵建康子仕輔國將軍朝散大夫贈滄州刺史謚曰惠子德正襲官至侍中綱紀朝政多有弘益文宣末縱酒德正屢進忠言帝不悅卒遇害後贈太保冀州刺史謚曰康

封軌 字廣度回族叔好學通覽經傳與光祿大夫武邑孫惠蔚同志友善頗自修潔儀容甚偉以兼員外散騎常侍御命高麗王雲恃其偏遠稱疾不

親受詔軌正色詰之諭以大義雲乃北面受旨軌既以方直自業又以務德慎言修身之本姦回讒佞世之巨害乃爲務德慎言遠佞防姦四戒

封回 蓀人曾孫懿有才器能屬文官至封侯鄭雲諂事長秋卿得爲安州刺史詣回問安州興生何事爲便回曰卿荷國寵靈位至方伯宜思方畧以濟百姓如何問興生乎雲慙失色

刁廕 饒安人協會孫劉裕微時負刁氏社錢三萬違時不還廕伯父達執而徵焉及裕誅桓元首以



嫌誅刁氏靡遂奔姚興復歸魏魏主義之以爲建  
威將軍使討裕靡遂招集醮梁彭沛五千餘家置  
二十七營移鎮濟陰賜爵東安伯又除薄骨律鎮  
將靡以西土極邊常懼不虞造城儲穀置兵備守  
有詔名其城爲刁公城卒年九十五謚曰簡子遵  
字奉國襲爵按薄骨律乃鎮名

高歡 修人初高湖自燕奔魏其子謚爲侍御史坐  
法徙懷朔世居北邊遂習鮮卑之俗謚孫歡小字  
賀六渾沉深有大志家貧執役在平城富人婁氏

女見而奇之遂嫁焉至洛陽見將軍張彝爲羽林  
虎賁亂軍所殺還家傾資以結客或問其故歡曰  
宿衛相率焚大臣之第朝廷懼其亂而不問爲政  
如此事可知矣財物豈可常守邪歡與司馬子如  
劉貴賈顯智孫騰侯景尉景蔡雋相友善並以任  
俠雄於鄉里時魏孝明帝神龜八年也

高勵 修人幼聰敏美風儀以仁孝聞襲爵清河王  
改封樂安王性剛直有才幹甚爲時人所重仕周  
終洮州刺史豪猾屏迹路不拾遺勵父岳深沉有



氣節常寓洛陽北齊神武每使入洛必至岳舍岳母山氏嘗夜起見神武室中無火而有光詣卜者筮遇乾之大有占者曰貴不可言山氏歸報神武神武後起岳於信都封清河王

封隆之 字裔祖寬和有度量延昌中以封法慶功賜爵武城子累遷河內太守未到屬爾朱兆入洛莊帝幽崩隆之以父回遇害常懷報雪因持節東歸圖義舉遂與高乾等夜襲冀州克之乃推爲刺史及齊神武自晉陽東出隆之遣子繪隨高乾奉

迎於滏口中興初拜吏部尚書隆之首叅神武經畧奇謀皆密以啟聞手書削藁罕知於外卒於齊州刺史謚宣懿

封子繪 字仲藻隆之子性和理有器局釋褐祕書郎累遷平陽太守加散騎常侍晉州北界霍山舊號千里徑者山坂高峻每大軍往來士馬勞苦子繪請於舊徑東谷別開一路神武從之仍令子繪修開旬日而就徵補大行臺吏部郎中神武崩祕未發喪文襄以子繪爲渤海太守執其手曰誠知



未允宜善加經畧不勞習常仍聽收集部曲千人  
大定三年爲都官尚書高歸彥作逆命子繪參贊  
軍事賊平勅子繪權行州事徵拜儀同三司尚書  
右僕射卒謚曰簡子寶襲

太和 正光

高諒 字修賢正德之弟也少好學多識強記居喪  
以孝聞太和末京兆王愉開府辟召孝文妙簡僚  
佐諒與隴西李仲尚趙郡李鳳起等同時應選正  
光中加驍騎將軍爲徐州行臺至彭城屬元法僧  
反逼諒同之不從見害贈滄州刺史又詔以諒臨  
危授命復贈使持節平北將軍幽州刺史優授一  
子出身謚曰忠侯

高翼 字次同豪俠有風神孝昌末葛榮作亂朝廷  
以翼山東豪右卽家拜渤海太守翼率合境徙居  
河濟間魏朝因置東冀州以翼爲刺史封樂城縣  
侯

封興之 字祖胄隆之弟經明行修恬素清靜位瀛  
冀二州刺史北平府長史所歷有官譽率以隆之  
佐命功贈殿中尚書雒州刺史謚曰文



封孝琰 字士光孝琬弟少修飾學尚有風儀位祕書丞散騎常侍聘使在道延授中書侍郎後除名尋復用爲吏部郎中後與崔季舒等以正諫同死子君確君靜二人徙北邊

封肅 字元邕因之兄博涉經史太傅崔光見而賞焉位尚書左中兵郎中性恭儉不妄交遊唯與崔勵及勵從兄鴻相親善所著文章多亡失存者十餘卷

高允 字伯恭修人漢太傅褒之後少有奇度清河崔寵見而異之曰高子黃中內潤明文外照必爲一代偉器旣長博通經史天文術數太武時入授景獻太子經又與崔浩同修國史後浩以史事獲罪被收景獻謂允曰人見至尊吾自導卿脫至尊有問但依吾語景獻見帝言允小心慎密且微賤制由崔浩請赦其罪帝詔問曰國史皆浩所爲乎對曰臣與浩共爲之然浩領事多總裁而已至於著述臣多於浩帝怒曰允罪甚於浩何以得生景獻懼曰天威嚴重允小臣逃亂失次耳帝問允信



如東宮所言乎允對曰臣罪當滅族不敢虛妄殿  
下以臣侍講日久欲丐其生耳帝顧謂太子曰直  
哉此人情所難而能爲之臨死不易辭信也爲臣  
不欺君貞也特除其罪後拜中書令領史事在位  
多所裨益光寵四世終享百齡初神麈中允與同  
郡高金俱被徵金位征南從事中郎

李伯貴 蓀人也魏宣武時官至魯郡守有孝行居  
父喪哀戚過禮以毀卒宣武贈渤海相子元胄孫  
崇爲魏散騎侍郎

張照 字士鴻羨之子好學有父風仕魏爲員外侍  
郎周文引爲外兵曹明武世位冢宰司隸賜爵北  
平縣子宣武時加儀同進爵爲伯隋文帝爲丞相  
照深自推結帝以其有幹用甚親遇之及受禪拜  
爲尚書右丞進爵爲侯遷太府少卿領營新都監  
丞丁父憂去職柴毀骨立末期授儀同三司襲爵  
虞鄉縣公歷太府卿戶部尚書晉王廣爲揚州總  
管授照司馬加銀青光祿大夫照性和厚有識度  
甚有時譽後拜冀州刺史晉王廣頻表請之復爲



晉王長史檢校蔣州事及晉王為皇太子復為冀州刺史位上開府吏人悅服稱為良二千石卒於官

北魏

李叔虎 蓀人也從祖金神麴中與高允俱被徵位征南從事中郎叔虎好學博聞有識度為鄉閭所稱太和中拜中書博士與清河崔亮河間邢巒並相親友三遷國子博士本國子中正攝樂陵中正性清直甚有公平之稱歷中書州事為吏人所稱

卒贈南清州刺史謚曰穆叔虎子述字道興有學識州舉秀才拜太常博士

黎廣 鄭人太武時為尚書郎善古學

吳遵世 渤海人入恒山學易遇老人授開心符吞之通明易理魏孝武時有所筮無不中文字襄時以年老辭中書舍人改中順大夫所著易林雜占百餘卷

高道悅 字文欣其先遼東人父元起武邑太守遂居蓀縣道悅少為中書學生侍御主文中散後為



諫議大夫正色當官不憚強禦

邢巒 字洪賓鄭人魏太常貞之後也巒少好學負  
帙尋師守貧立節遂博覽書傳有文才幹畧美鬚  
髯姿貌甚偉累遷員外散騎常侍使齊還再遷中  
書侍郎甚見顧遇巒才兼文武朝野宿望卒贈車  
騎大將軍瀛州刺史謚曰文定子遜

高昂 字敖曹祐從弟少有壯氣及長個儻膽力過  
人龍犀貌頸姿體雄異其父爲求嚴師令加捶撻  
昂不遵訓專事馳騁曰男兒當橫行天下自取富

貴誰能端坐讀書作博士也聞魏莊帝遇害遂與  
父兄據信都起兵討賊及神武至信都遂開門奉  
迎歷官大都督統七十六部兵屢立戰功每戰披  
甲橫戈摧鋒徑進所向披靡觀者莫不壯之封永  
昌王謚忠武以子道額嗣王爵

高季式 昂之弟字子通有膽氣大昌初累遷尚食  
典御尋加驃騎大將軍天平中爲濟州刺史季式  
兄弟貴盛並有勲於時謚曰恭穆

高隆之 字延興蓀人隆之後有參定功齊神武命



爲弟贈其父幹爲司徒公隆之身長八尺美鬚髯  
深沉有志氣天保五年以與元暍宴語爲人所言  
帝深銜之尋令壯士築百餘拳遂飲水死於路中  
贈太保

李雄 蓀人也少慷慨有壯志弱冠從周武帝伐齊  
以功授元帥都督隋文帝作相從韋孝寬尉遲迥  
拜上開府賜爵建昌縣公雄明辯有器幹從幸江  
都帝以仗衛不整顧雄部伍之雄立指揮六軍肅  
然帝大悅曰公真侯衛才也

高敬猷 道悅之子也有風度蕭保夤西征引爲驃  
騎司馬及保夤謀逆敬猷與行臺郎中封偉伯等  
潛圖義舉謀洩見殺贈滄州刺史聽一子出身

邢蚪 字神彪著作郎敏之子也少爲三禮鄭氏學  
明經有文思舉秀才上第爲中書議郎尚書殿中  
郎孝文因公事與語問朝廷宴饗神蚪以經對大  
合上旨帝崩尚書令王肅多用新儀蚪往往折以  
五經正禮爲尚書左丞多所糾正臺閣肅然母喪  
哀毀過禮爲時所稱卒贈幽州刺史謚曰威



馮景 字長明河間武垣人父傑爲伏興令景少與周惠達友俱以客從蕭寶夤寶夤後爲尚書僕射引景領尚書都令史正光中寶夤爲關西大行臺景又爲行臺都令史及寶夤敗還長安或議歸罪闕下或言留州立功景曰擁兵不還此罪將大寶夤不從遂反及寶夤平景方得還洛朝廷聞景有諫言故不罪

邢邵 字子才 魏人 年五歲魏吏部郎清河崔亮見而奇之曰此子後當大成位望通顯十歲便能屬

文雅有才思聰明強記日誦萬餘言族兄巒謂子弟曰宗室中有此兒非常人也少在洛陽以霖雨不暇游宴乃讀漢書五日畧能編之後因飲謔倦左廣尋經史五行俱下一覽便無所遺文章典麗旣贍且速年未二十名動衣冠宣武甚親重之後除驃騎西兗州刺史在州有善政桴鼓不鳴

邢臧 字子良幼孤早立操尙博學有藻思年二十一神龜中舉秀才考上第爲太學博士正光中議立明堂臧爲裴頡一室之議事雖不行當時稱其



合義出爲本州中從事雅爲鄉情所附永安中徵爲金部郎中以疾不赴轉東牟太守時天下多事在職少能廉白臧獨清慎奉法吏人愛之贈鎮北將軍定州刺史謚曰文子恕涉學有識悟齊武平末尚書屯田郎隋開皇中尚書侍郎卒於沂州長史

張羨 鄭人也少好學多所通涉仕魏爲蕩難將軍從武帝入關累遷銀青光祿大夫周文引爲從事中郎賜姓叱羅氏歷司職大夫雍州中從事應州

刺史儀同三司賜爵虞鄉縣公復入爲司城中大夫典國史周代公卿類多武將唯羨以素業自通甚爲當時所重後以年老致仕隋文帝受禪欽其德望以書徵之及謁見勅令勿拜扶杖升殿上降榻執手與之同坐宴語久之賜以几杖會遷都龍首羨上表勸以儉約上優詔答之卒贈滄州刺史謚曰定所撰老子莊子義各道言五十二篇

黎景熙 字季明疑之曾孫父瓊襲容城縣男爵季明少好讀書性强記默識而無應對之能其從祖



廣武泰時尚書郎善古學嘗從吏部尚書清河崔宏受字義又從司徒崔浩學楷篆自是家傳其法季明亦傳習之頗與許氏異又好元象頗知術數而落魄不事生業有書千餘卷惟窮居獨處不以飢寒易操與范陽盧道源爲莫逆交永安中道源勸令仕始爲威烈將軍孝武西遷季明乃寓居伊洛侯景徇地河外召季明從軍稍遷黎陽郡守季明從至懸瓠察景終不足恃遂去之客於潁川時王思政鎮潁川累使召季明留於內館月餘周文又徵之遂入關乃令季明正定古今文字於東閣大統末拜著作佐郎於時倫輩皆位兼常伯車服華盛惟季明獨以貧素居之而無愧色

劉善經 河間人博物洽聞尤善詞章歷著作郎太子舍人著酬德傳三十卷諸劉譜三十卷四聲指歸一卷行於世

孟信 字修仁廣川索盧人也家世貧寒頗傳學業信常曰窮則變變則通吾家世傳儒學無有通官當由儒非世務也遂感激棄書從軍永熙末除奉



朝請從孝武帝入關封東州子趙平原太守政尚寬和權豪無犯山中老人曾以純酒饋之信和顏接引殷勤勞問乃自出酌中酬酢之意謂老人曰吾至郡無以一物見遺今卿獨有此餉且食菜已久欲爲卿受一純膊耳老人大悅再拜擘純膊進之酒盡方別及去官居貧無食惟有一老牛其兒子賣之以供薪米券契已訖市法應知牛主住在所信適從外來見買牛人方知其賣也因告之曰此牛有病小用便發恐負汝杖其兄子二十買牛人嗟異良久周文帝聞而異之未幾舉爲太子太師後遷太子太傅儒者榮之特加車騎大將軍儀同三司散騎常侍辭老請骸周文賜車馬几杖衣服床帳卒於家贈冀州刺史

邢晏 篤於友愛初爲南兗州例得一子解褐乃啓其孤弟子子慎爲朝請子慎年甫十二而子已弱冠矣後爲滄州復啓孤兄子昕爲府主簿而其子並未從仕焉世以此多之子亢字子高頗有文學位兼通直散騎常侍使於梁時年二十八後爲中



外府屬坐事死於晉陽

黎嶷 鄭人魏武泰時以軍功賜爵容城縣男後爲

燕郡守子鎮襲爵

東魏

封述 字君義有幹用天平中爲三公郎中時增損舊事爲麟趾新格其名法科條皆述所刪定齊受禪累遷太理卿清河元年勅與錄尚書趙彥深等議定律令歷位度支五兵殿中三尚書述久爲法官明解律令議斷平允深爲時人所稱而厚積財

產一無分饋雖至親密友貧病困篤亦無拯濟朝野鄙之子元舊位太子舍人弟詢字景文闕涉經史以清素自守位尚書左丞濟南太守歷官有幹局著績隋開皇中卒史臣論曰封回克光家世隆之勤勞霸業子繪實隆堂構可謂載德者矣君義聚歛嗇悛無乃鄙哉

李鉉 字寶鼎渤海南皮人九歲學書急就篇月餘便通家素貧嘗春夏務農冬乃入學年十六歲從浮陽李周仁受毛詩尚書章武劉子猛受禮記常



山房蚪受周官儀禮漁陽鮮于靈馥受左氏春秋  
鉉以鄉里無可師者遂與同里楊元懿河間宗惠  
振等結友詣大儒徐遵明受業居徐門下五年尚  
稱高弟年二十三潛居討論是非撰定孝經論語  
毛詩三禮義疏及三傳異同周易義例合三十餘  
卷用心精苦曾三秋冬不蓄枕每睡假寢而已年  
二十七歸養二親因教授鄉里生徒數百人燕趙  
間能言經者多出其門以鄉里寡文籍來游京師  
讀所未見書舉秀才除太學博士及李同軌卒齊

神武令文襄妙簡碩學以教諸子文襄以鉉應旨  
卒特贈廷尉少卿及還葬王人將送儒者榮之

權會

字正理鄭人也志尚沈雅動遵禮則少受鄭

易妙盡幽微詩書三禮之義該洽兼明風角妙識  
元象仕齊初四門博士僕射崔暹引爲館客甚敬  
重焉命世子達挈盡師傅之禮暹欲薦會與馬敬  
德等爲諸王師會性恬靜不慕榮勢耻於左官固  
辭暹識其意遂罷薦舉尋追修國史監知太史局  
事後遷國子博士

東魏人物



李周仁 浮陽人以明經教授鄉閭南皮李鉉嘗從  
周仁受毛詩尚書

劉軌思 渤海人說詩甚精少事同郡劉敬和敬和  
事同郡程師則故其門曲多爲師者軌思仕齊位  
至國子博士

鮑季詳 渤海人甚明禮兼通左氏春秋少時曾爲  
李寶鼎都講後亦自有徒衆諸儒稱之仕齊卒於  
太學博士從弟長暄兼通禮傳爲任城王潛丞相  
掾恒在都教授貴游子弟天保七年召與河間秀  
才馬敬德許散愁韓同寶等十一人共刊定祕府  
書籍訛謬者齊亡卒於家

馬敬德 河間人少好儒術負笈隨徐遵明學詩禮  
畧通大義而不能精遂留意於春秋左氏沉思研  
求晝夜不倦教授於燕趙間生徒從之者甚衆

邢峙 字士峻鄭人少好學通三禮左氏春秋仕北  
齊爲國子助教以經入授皇太子峙方正純厚有  
儒者風厨宰進太子食有邪蒿峙令出之曰此菜  
有不正之名非殿下宜食文宣嘉之後爲清河太



守有惠政卒

張思伯 樂城人善說左氏傳爲馬敬德之次撰刊  
例十卷行於世亦爲毛詩章句以二經教授齊安  
王廓爲國子博士時有長樂張奉禮善三傳與思  
伯齊各位國子助教

劉晝 字孔昭阜城人少孤貧好學從李寶鼎受三  
禮又就馬敬德習左氏春秋恨下里少墳籍策杖  
入都知鄴令宋世良家有書五千卷求爲其子博  
士恣意披覽晝夜不息累舉秀才不第北齊時刺

史李璵嘗欲以晝應詔先問之晝曰公自爲國舉  
才何勞語晝孝昭卽位求直言晝步詣晉陽上書  
言甚切直而多非世事遂不見收乃編錄所上之  
書名曰帝道又著金廂壁言以指時政之不良者  
竟不仕終

李希光 蓀人初從高乾起兵後位儀同三司揚州  
刺史文宣陳武帝廢蕭明命儀同蕭軌率希光東  
方老裴英起王敬保步騎數萬以天保七年三月  
渡江襲克石頭城五將名位相侔英起以侍中爲



軍司蕭軌與希光並爲都督軍中抗禮動必乖張  
頓軍丹陽城下霖雨五十餘日故致敗將卒皆死  
軍士得還者十二三

劉孟和 名協饒安人聚衆附昂兄弟位終太丞相  
司馬

信都芳 河間人少明算術兼有巧思嘗云算法之  
妙機巧精微我每一沉思不聞雷霆之聲嘗集五  
經算事爲五經宗及古今樂事爲樂書又聚渾天  
欵器地動銅鳥漏刻候風諸巧事并圖畫爲器準

封長城子

隋

邢宇 字紹宗弟宙字次宗河間人嘗師元文行先  
生先生名德秀字紫芝河南人

盧大翼 河間人本姓章讐氏七歲日誦數千言州  
里號曰神童及長博綜羣書尤善占候隱林慮山  
中受業者自遠而來文帝將避暑仁壽宮大翼固  
諫帝怒將斬之及疾將崩命太子釋之煬帝卽位  
賜姓盧氏其言天文事應驗者不可勝數



張胃元 修人博學精術數隋文帝徵授雲騎尉直  
太史叅議律曆事時多出其下胃元所推步甚精  
上特異之

賈建德 漳南人今故城地自言漢景帝高太后父

安成侯克之苗裔才力絕人因隋亂起兵大業十

六年正月築壇場於河間樂壽自立為長樂王已

更號夏王建元五鳳興王世充連兵唐兵圍世充

洛陽城中乏食建德引兵救之其鋒甚銳且遺書

請退軍復修前好郭孝恪曰世充窮蹙行將面縛

建德運糧遠來此天意欲兩亡之也世民善之將

兵出武牢東建德迫於武牢退入牛口谷時軍中

謠云豆入牛口勢不得久於是屢戰不利中槩墜

馬為白士讓楊武威所縛傳至西京斬於長安市

劉武周 景城人徙馬邑隋末因眾殺太守王仁恭

起兵開倉賑貧得兵萬人遣使附突厥據汾陽宮

兵勢日盛進逼并州齊王元吉棄并州奔還長安

高祖悉發關中兵益世民使擊之大戰三日不解

甲遂敗其將宋金剛金剛食盡北走其將尉遲敬



德等降武周聞之大懼棄并州入突厥後見殺

高頴 字昭元父賓都州刺史頴少明敏有器局西魏賜姓獨孤氏文帝執周政時引爲司錄委以心膂累立戰功文帝旣卽位拜左僕射兼納言封渤海郡公朝章制度多出於頴大舉伐陳以頴爲元帥長史三軍諮稟皆取斷焉及陳平晉王欲納陳主寵姬張麗華頴曰武王滅殷殺妲己今平陳不宜取麗華乃斬之以功封齊國公任寄益隆貞觀十二年太宗謂房元齡等曰昔高頴相隋公平讖治體隋之興亡係頴之存沒朕慕前世之明君卿等可不法前世之賢相乎

王伽 河間人文帝時爲齊州行叅軍送流囚李參等七十餘人詣京師行至滎陽謂曰卿輩自犯國刑身嬰縲繼固其職也重勞援卒豈不愧心參等辭謝叅軍乃悉脫其枷鎖停援卒與約曰某日當至京師如致前却吾當爲汝受死遂捨之而去流人感悅如期而至一無離叛帝聞而驚異召見與語稱善久之於是悉召流人晏而赦之因下詔曰



使官盡王伽民皆李參刑措其何遠哉乃擢伽為  
雍令

公孫景茂 字元蔚阜城人也博涉經史人稱為書  
庫隋開皇初召為汝南太守郡廢為曹州司馬遷  
息州刺史法令清靜德化大行屬平陳之役征人  
在路病者景茂減俸祿為粥饘湯藥多方賑濟之  
賴全活者千數上聞嘉之詔宣示天下大業初卒  
官年八十七謚曰康身死之日諸州人吏赴喪者  
數千人或不及葬所皆望墳痛哭野祭而去

熊安生 字植之阜城人少好學勵精不倦博通五  
經專以三禮教授子弟至千餘人齊清河中為國  
子博士時後周既行周禮有宿疑碩滯數十條皆  
莫能辨天和二年使兵部尹公正來聘語及周禮  
齊人不能對乃令安生至賓館公正有口辯安生  
語未至者便撮機要而驟問之安生曰禮義宏深  
自有條貫必欲升堂觀奧豈可汨其先後但能畱  
意當為次第陳之公正於是質所疑安生為一一  
演說咸究根本公正嗟服還具言之武帝武帝欽



重之入鄴首幸其第引與同坐曰齊氏竭人財力  
朕欲以府庫散之百姓何如安生曰武王克商散  
財發粟陛下此詔異代同美帝大悅給安車入朝  
拜露門文學博士年八十餘卒所著有周禮義疏  
二十卷禮記義疏三十卷孝經義疏一卷

劉焯 字士元河間人犀額龜背望高視遠聰敏沉  
深隋初召至京師與諸儒於秘書省考定羣言因  
假還鄉縣引爲公曹尋復入京與楊素牛弘等於  
國子共論古今莫不服其精博開皇中爲著作郎

封德 繡之子隋扶風郡南陽縣令陳子昂遺愛碑  
稱其芸扁觀奧見天下之圖石柱聞琴知君子之  
化

劉炫 字光伯景城人少以聰敏見稱與信都劉焯  
閉戶讀書十年不出炫眸子精明視日不眩強記  
默識莫與爲儔左書圓右書方口誦目數耳聽五  
事同舉無所遺失武平齊瀛州刺史宇文充召爲  
巨曹從事後刺史李繪署禮曹從事以吏幹知名  
隋開皇中奉勅與著作郎王劭同修國史俄直門



下省以待顧問  
 楊慶 字伯悅河間人也祖元父剛竝以至孝知名  
 慶美姿儀頗涉書記年二十五郡察孝廉以待養  
 不起其母有疾不解襟帶者七旬及居母喪哀毀  
 骨立負土成墳齊文宣表其閭隋文帝受禪屢加  
 褒賞擢受儀同三司攝平陽太守卒於家年八十  
 五

唐

李綱 字文紀修人少慷慨尚風節始名瑗慕張綱

爲人改焉仕周爲齊王憲參軍事宣帝將殺憲召  
 僚屬誣佐其罪綱矢死無撓辭及憲誅露車載尸  
 故吏奔匿綱撫棺號痛爲瘞訖乃去仕隋爲太子  
 洗馬太子勇晏宮臣左庶子唐令則奏琵琶又歌  
 斌媚娘曲綱曰令則官調護乃自比倡優進淫聲  
 惑視聽誠使上聞之豈不爲殿下累乎後勇廢文  
 帝切讓官屬綱對曰太子資中人得賢者輔而善  
 奈何歌舞鷹犬纖兒使日侍側何特太子罪耶帝  
 曰以汝爲洗馬何不擇人綱曰臣非東宮得言者



帝曰朕過矣擢尚書右丞時楊素蘇威用事綱持正不詭迎隨後詔出南海應接林邑久不召乃身入奏威劾綱擅去所部以屬吏會赦免大業末賊何潘仁劫爲長史高祖平京師綱上謁旋拜禮部尚書兼太子詹事帝以舞工安叱奴爲散騎常侍綱諫不納後太子寢狎無賴綱頻諫不見聽遂乞骸骨帝罵曰爲潘仁長史而羞朕尚書耶綱曰潘仁賊也然每諫輒止故爲長史無媿陛下厚自伐臣言如持水納石且東宮又與臣忤是以上印綬

帝謝曰知公直士幸卒輔吾兒帝以綱隋名臣手勅未嘗名貞觀四年復爲少師以足疾賜步輿聽乘至閣問事及疾帝遣房元齡至家存問卒年八十五歲贈開府儀同三司謚曰貞

景州

高馮 字季輔以字行蓀人居母喪以孝聞進爵蓀縣公永徽初加光祿大夫侍中兼太子太保感疾歸第有詔以其兄虢州刺史季通爲宗正卿視其疾遣中侍日候增損卒年五十八贈開府儀同三司荆州都督謚曰憲



袁高 字公願恕已之孫少慷慨有節尚擢進士第  
 德宗將起盧杞為饒州刺史高當草詔見宰相盧  
 翰劉從一曰杞當國矯誣陰賊斥忠誼傲明德反  
 易天常纔示貶黜今還授大州天下其謂何翰等  
 不悅命舍人作詔詔出高執不下

李懷讓 蓇人神龍中為監察御史崔湜鄭愔吏部  
 選附勢倖銓擬不平懷讓與趙郡李尚隱顯劾其  
 罪湜等皆斥去

高元裕 字景圭其先渤海人第進士累辟節度府  
 李宗閔高其節擢諫議大夫進中書舍人元裕性  
 勤約通經術敏於為吏事巖巖有風采推重於時  
 自侍講為中丞文宗難其代元裕表言兄少逸才  
 可任因以命之世榮其遷

張利貞 河間人元宗時試為御史中丞舉彈無所  
 避由是出為陳畱守領河南道採訪處置使子郇  
 以儒學進官至侍御史

張置 郇之子方直有氣形貌魁碩長於文辭以進  
 士第舉博學宏辭為校書郎自京兆武功尉拜監



察御史爲幸臣所讒與同輩韓愈李方叔三人俱爲縣令

任廸簡 滄州人初天德防禦使李全畧嘗晏僚佐行酒者誤以醯進廸簡恐行酒者獲罪強飲之歸而嘔血軍士聞之泣下及全畧卒遂欲奉以爲帥監軍以聞詔從之

劉公濟 河間人厚寬碩大與物無忤爲渭北節度使入爲工部尚書

袁恕已 東光人仕累司刑少卿知相王府司馬與

誅二張又從相王統南衙兵備非常以功封南陽郡公實封五百戶匠作少監楊務廉者以工巧進恕已恐其復啓游娛侈麗之漸言於中宗曰務廉位九卿忠言嘉謨不聞而專事營構以媚上不斥之無以昭德乃授陵州刺史卒謚貞烈文宗開成三年詔恕已曾孫德文校書郎

李湛 義府最幼子字興宗沉厚有度六歲授周王府文學累遷右散騎常侍襲河間郡公武后徙上陽宮畱湛宿衛頃之復爲右散騎常侍賜鐵券與



張柬之敬暉李多祚王同皎請太子至元武門斬關入及長生殿白武后曰諸將誅逆臣易之昌宗恐漏大謀不敢豫奏頓首請歸死后病卧顧湛曰我於而父子不薄亦與是耶後遷左領大將軍開元十年卒贈幽州都督

王峻

滄州人後徙洛陽父行果爲長安尉知名峻

少孤好學祖有方奇之曰是子當興吾宗長豪曠擢明經第始調清苑尉歷除殿中侍御史會朔方元帥魏元忠討賊不利劾奏副將韓恩忠敗律當

誅峻以思忠偏裨權非已制且其人勇智可惜不

宜獨誅固爭得釋峻亦出爲渭南令景龍末授桂州都督州有兵舊常仰餉衡永峻始築羅郭罷戍卒埭江開屯田數千頃以息轉漕百姓賴之後以洮水戰捷加銀青光祿大夫明年突厥叛峻自東道追獲三千級以功遷朔方大總管峻氣貌偉特有古人風始二張誣魏元忠峻獨上疏申救宋璟曰魏公全矣子再觸逆鱗其殆哉峻曰魏公以忠獲罪苟得辨雖死弗悔後以戶部尚書爲朔方軍



節度使卒贈尚書左丞相謚忠烈後信安王禕討  
奚於幽州告捷且言戰時見峻麾兵赴敵天子嗟  
異封峻墓表異之優其子孫

邢君牙

樂壽縣人少從幽薊平盧軍以戰功歷果

毅折衝郎將吐蕃犯京師代宗出陝以扈從功累  
封河間郡公吐蕃歲犯邊君牙勸耕講戰以為備  
戎不能侵卒官贈司空初布衣張汾者無紹而干  
君牙軒然坐客上會吏撻簿書以盜沒晏錢五萬  
君牙怒其欺汾不謝去曰吾在京師聞邢君牙一  
時豪俊今乃與吏論錢云何君牙慙遽釋吏引為  
上客留月餘以五百緡為謝

高崇文

其先渤海人徙幽州之遂城七世不異居

開元中再表其閭卒配饗憲宗子承簡為澠州刺  
史有惠政孫駢懿宗咸通六年用夏侯攷薦以驍  
衛將軍為嶺南西道節度使大破南詔加檢校工  
部尚書

高瑀

蓀人少沉邃喜言兵釋褐右金吾胄曹叅軍

又以檢校左散騎常侍領忠武節度使州比水旱

高州



瑀相地宜築隄塘百八十里時其鍾洩民賴不饑  
再加檢校尚書右僕射卒贈司空瑀寬和居官無  
赫赫譽所至稱治人人懷之

高儉 字士廉以字顯修人勵之子也敏惠有度量  
狀貌若畫觀書一見輒誦仕隋爲朱鳶王簿會世  
大亂唐高祖遣使徇嶺南武德五年與交趾太守  
來歸時太宗領雍州牧薦士廉爲治中封儀興郡  
公出爲益州大都督府長史有治績入爲吏部尚  
書進封許國公雅負才鑒用人無不當者遷尚書  
右僕射士廉三世居此官世榮其貴卒贈司徒謚  
文獻陪葬昭陵

張濬 字禹川本河間人性通脫無檢汎知書史喜

高論士友擯薄之黃巢之亂稱疾挾其母走商山  
僖宗西出衛士食不給濬陰令李康獻糗餌數百  
馱士皆厭給帝異之曰爾乃及是乎對曰臣安知  
爲此張濬教臣也乃急召濬至行在再進諫大夫  
時王敬武在平盧軍最彊累召不肯應濬責之曰  
公爲天子守藩今使者齎詔至不北面俯從而敢



侮慢公乃未識君臣大分何以長吏民哉敬武愕  
貽愧謝濬召將佐至鞠場倡言忠義之士當審利  
害今諸侯勤王者踵相接公等據一州以觀成敗  
後賊平將安往誠能此時共誅大盜迎天子功名  
富貴可反手而取吾憐公捨安而蹈危也諸將雜  
然曰諫議語是敬武卽引軍從濬西

李安靜 蓀人綱之孫中宗嗣聖九年武則天將革  
命王公百官皆上表勸進安靜爲右將軍獨正色  
拒之及制出下獄來俊臣請其反狀安靜曰我唐

家老臣欲殺卽殺若問反謀實無可對俊臣竟殺  
之

彭景直 河間人中宗景龍末爲太常博士時獻昭  
乾三陵皆日祭景直上言在禮陵不日祭宗廟有  
月祭故王者設廟祧壇墀爲親疏多少之殺立七  
廟一壇一墀有禱祭之無禱乃止

張士衡 樂壽人父文慶北齊國子助教士衡九歲  
居母喪哀慕過禮博士劉軌思見之爲泣下奇其  
操謂文慶曰古不親教子吾爲君成就之乃授以

獻子

景州



詩禮又從熊安生劉焯受經貫知大義仕隋爲餘  
杭令以老還家大業兵起諸儒廢學唐興士衡復  
教授鄉里幽州都督燕王靈夔以禮邀聘北面事  
之太子承乾慕風迎致謁太宗洛陽宮帝賜食擢  
朝散大夫崇賢館學士太宗以士衡齊人也閔高  
氏何以亡對曰克險佞才是信是使忠良外誅骨  
肉內離剝喪元良故周師壓郊人莫爲之用此所  
以亡復問事佛營福其應若何對曰事佛在清靜  
仁恕耳如貪婪驕虐雖傾財事之無損於醜且善

惡必報若影赴形聖人言之備矣爲君仁爲臣忠  
爲子孝則福祚永反是殃禍至矣時太子以過失  
聞因以是規之太子廢給傳罷還鄉里卒

程元 渤海人以詩教授渤海饒陽劉獻之往受業  
焉

邢和璞 不知何許人隱於瀛海間善算心術凡人  
心之所計布筭而知之下居嵩嶺聞著穎陽書三  
篇有算心旋空之訣

李清 北海人卽渤海附庸也隋開皇四年入雲門



山窟遇僊授書一軸甫旬歸已爲唐永徽元年矣  
開所授書乃小兒醫方屢試屢驗後入太行不見

封倫 字德彛 修人 祖隴北齊太子太保倫年方少

舅盧思道曰是兒識略過人當自致卿相陪開皇  
末江南亂內史令楊素討之署倫行軍記室泊海  
上素召計事倫墜水免易衣以見訖不言久之素  
知問故讞曰私事也不敢白素異其爲以從妹妻  
之素營仁壽宮表爲土工監規構鴻侈宮成文帝  
怒曰素殫百姓力爲吾措怨天下素大懼倫曰勿

恐皇后至自當免明日帝果勞素曰公知吾夫婦  
老無以自娛樂而盛飾此宮耶因大悅素退問何  
料而知倫曰上節儉故始見必怒然雅聽后言后  
婦人惟侈麗是好后悅則帝安矣素曰吾不及也

幸南容 渤海人貞元元年中進士第柳子謂其旣  
登太常之籍又應邯鄲之召北合元戎直道自達  
吾儕器其畧南聘天朝相與述職公卿多其儀

邢羣 河間人嘗以狀爲河東裴處士某求柳宗元  
文



田弘敏 任丘人周司法參軍祖某為章武郡功曹

父恭高陽縣尉弘敏後卒於任丘

何滿 滄州人白樂天云開元中何滿犯罪繫獄中

撰曲曰河滿子鞠獄者愍之為之奏明皇不許竟

坐

王仲卿 任丘人唐文宗太和中為金紫光祿大夫

檢校鴻臚卿兼監御史

趙君治 宗允之父南皮人試左武衛胄曹參軍宗

允兄宗愿試太常協律郎攝德州平昌縣尉移攝

滄州臨津縣尉

高適 字達夫一字仲武渤海人少落魄不治生事

客梁宋間宋州刺史張九臯奇之舉有道科中第

調封丘尉不得志去客河西河西節度使哥舒翰

表為左驍衛兵曹參軍掌書記祿山亂召翰討賊

即拜適左拾遺轉監察御史佐翰守潼關翰敗帝

問羣臣策安出適請竭禁藏募死士抗賊未為晚

不省天子西幸適走間道及帝於河池因言翰忠

義有素而病奪其明乃至荒踣監軍諸將不恤軍



務以倡優蒲塞相娛樂渾隴武士飯糲米日不厭而責歿戰其敗固宜又魯炅何履光趙國珍屯南陽而一二中人監軍更用事是能取勝哉臣數爲楊國忠言之不肯聽故陛下有今日行未足浚耻帝領之俄遷侍御史擢諫議大夫負氣敢言權近側目帝以諸王分鎮適盛言不可俄而永王叛肅宗雅聞之召與計事因判言王且敗不足憂帝竒之除揚州大都督府長史淮南節度使詔與江東韋陟淮西來瑱率師會安陸方濟師而王敗封渤

海縣侯永泰元年卒贈禮部尚書謚曰忠適年五十始爲詩卽工每一篇出好事者卽傳播撰有中興間氣集

賈耽 字敦詩南皮人天寶中舉明經補臨清尉上書論事徙太平河東節度使王思禮署爲度支判官累進汾州刺史治凡七年政有異績召授鴻臚卿兼左右威遠營使俄爲山南西道節度使梁崇義反東道耽進屯穀城取均州建中三年徙東道德宗在梁耽使司馬樊澤奏事澤還耽大置酒會



諸將俄有急詔至以澤代耽召爲工部尙書耽納詔於懷飲如故既罷召澤曰詔以公見代吾且治行敕將吏謁澤大府張獻甫曰天子播越而行軍以公命問行在乃規旄鉞利公土地可謂事人不忠矣軍中不平請爲公殺之耽曰是何謂邪朝廷有命卽爲帥矣吾今趨覲得與君俱乃行軍中遂安卒年七十六贈太傅謚曰元靖耽不喜臧否人物爲相十三年雖安危大事無所發明而檢身勵行乃其所長每歸第對賓客無少倦家人近習不見其喜愠世謂淳德有常者

張子容 樂城人與孟浩然相唱和

劉文房 字長卿河間人開元中進士至德中爲監察御史以檢校祠部員外郎爲轉運使判官赴淮西鄂岳轉運留後觀察使吳仲儒誣奏轉潘州南巴尉令有爲辨之者除睦州司馬終於隋州刺史爲盛唐詩以有隋州集十卷行於世元好問曰學詩顯門有白首不能道長鄉一字者

高重 字文明儉五世孫以明經中第爲轉運巡官



進司門郎中敬宗慎置侍講學士以重簡厚惇正  
與崔郾偕授是職再擢國子祭酒文宗好左氏春  
秋命分列國各爲書成四十篇與鄭覃刊定九經  
於石出爲鄂岳觀察使以美政被褒拜太子賓客  
卒贈太子少保

封敖 字碩夫其先修人元和署進士第江西裴堪

辟置其府轉右拾遺雅爲宰相李德裕所器會昌  
初以左司員外郎召爲翰林學士三遷工部侍郎  
敖屬辭瞻敏不爲竒澁語切而理勝武宗使作詔

書慰邊將傷夷者曰傷居爾體痛在朕躬帝善其  
如意出賜以宮錦劉稹平德裕以定策功進太尉  
時敖草其制曰遏橫議於風波定竒謀於掌握謀  
皆予同言不它惑謂敖曰陸生根文不迫意如君  
等此語豈易得邪解所服玉帶贈之卒子彥卿望  
卿從子特卿皆第進士修有封其亦以明經擢進  
士第

苗神客 東光人爲周王府戶曹叅軍後與元萬頃  
等同選爲著作郎撰列女傳臣軌百僚新誠樂書



等九十餘篇至朝廷擬議表疏皆密使叅處故時號北門學士供奉左右二十餘年終著作郎

項仲山 安陵清者飲馬渭水每投三錢

李戡 字定臣渤海敬王奉慈七世孫年十歲好學天寒夜無燃膏默溫所誦熟文舉進士就禮部試吏唱名乃入戡耻之遂反不就試隱居江東陽羨論著數百篇嘗惡元和中元白詩纖艷乃集當世人詩類古者斷以為唐詩

徐文亮 無隸人天性孝友兄弟數世同居人無間

言貞觀中旌表其門賜以粟帛存問仍復其本身之役

劉君良 瀛州人四世同居族兄弟猶同產也門內

斗粟尺布無所私隋大業末荒饑妻勸其異居易置其庭樹鳥雛合鬪且鳴家人恠之妻曰天下亂禽鳥不相容况人耶君良即與兄弟別處月餘密知妻計即斥去其妻曰爾破吾家召兄弟以告更復同居天下亂鄉人共依之眾築為堡因號義成堡武德中深州別駕楊弘業至其居凡六院共一



庖子弟皆有禮節弘業歎羨而去貞元六年表異門閭

景州

高郢 字公楚蓆人九歲通春秋能屬文天寶末大盜據京師父伯祥為好時尉為盜執將刑郢年十五披髮解衣請代死盜義之俱得釋長有文章規矩自立不干貴幸嘗知貢舉擢班肅第一時以為得人以太常為相罷居子定辨慧七歲讀尚書至湯誓跪問父曰奈何以臣伐君郢曰應天順人何謂伐耶對曰用命賞於祖不用命戮於社是應天順人乎郢異之

許法慎 清池人母喪廬於塋有甘露嘉禾連理白兔之異初法慎三歲見母病即不飲乳或以珍餌悅之輒進母孝殆天性也天寶中表異其閭

滄州

牛庭玉 清池人弟庭金兄弟數世同居人無間言有詔旌表門閭

劉宣董永朱寶 俱河間人三人皆數世同居唐時旌表門閭賜粟帛使州縣存問復賦稅

鄭士才 滄州人



孫楚信劉賢 清池人

邊鳳舉 渤海人四人皆以孝悌稱於鄉里

五代

王延 字世美鄭州人少好學嘗以賦謁梁相李琪

琪為之稱譽薦為卽墨縣令馮道作相與延故人

召拜左補闕遷水部員外郎知制誥拜中書舍人

權知貢舉吏部尚書盧文紀與故相崔協有隙是

時協子順方舉進士文紀謂延曰吾嘗譽子於朝

貢舉選事當求實效無以虛名取人延退而笑曰

盧公之言為崔協也恨其父遂及其子耶明年選

頥甲科人皆稱其公

賈玘 南皮人字仲寶天福三年進士解褐宋初為

刑部郎中知浚儀縣性嚴毅善教子士大夫子弟

來謁必諄諄誨誘子黃中方五歲玘每旦令正立

展書卷比之謂之等身書課其誦讀恒令蔬食曰

俟業成乃得食肉

趙狻 本居河間世為大儒尤博雅耽道隋徵學士

與同郡劉焯俱至京師補黎陽郡長狻二子禮與



禮輟輿官至臨穎丞輟爲校書郎並著名當代禮  
輿子元素有英雄之姿學不常師志在遐遠年二  
十七褐衣游洛陽天下名流翕然宗仰尋卒射洪  
陳子昂爲考謚定名號曰昭彞子

李瓊 饒安人也少爲騎將與晉高祖俱歷唐明宗  
麾下同光二年契丹犯塞明宗出涿州遇契丹戰  
不勝諸將各稍引去而晉高祖獨戰不已契丹漸  
合而圍之瓊引高祖衣與俱遯至劉李河追兵且  
及瓊浮水先之南岸高祖至河中流馬踣瓊援出  
之又以所乘馬與高祖而步護之走十餘里乃得  
免

趙玉 幽薊人久游滄州節度判官呂覲之門劉守  
光攻陷滄州覲見禽族誅子琦年十五將并戮玉  
給監刑者曰此子某之同氣也幸毋濫焉引之俱  
去琦病足玉負之而行逾數百里變姓名乞食於  
路竟免於難琦常德王將厚報之玉疾琦躬爲扶  
持供其醫藥及卒代其家營葬事玉之子曰文度  
旣孤而幼琦誨之甚篤文度登進士第升宦路琦



有力焉議者以非王之義不能存呂氏之祀非琦  
之仁不能撫趙氏之孤君子兩美之

劉仁恭 樂壽人也事幽州李可舉能穴地爲道以  
攻城軍中號劉窟頭稍以功遷軍校仁恭爲人有  
勇好大言可舉死子匡威惡其爲人不欲使居軍  
中徙爲瀛州景城縣令瀛州軍亂殺刺史仁恭募  
縣中得千人討平之匡威喜復以爲將使戍蔚州  
毛璋 滄州人也梁末戴思遠爲橫海軍節度使璋  
事思遠爲軍校晉已下魏博思遠棄滄州出奔璋

以滄州降晉以功爲貝州刺史璋爲人有膽勇自  
晉與梁相拒河上璋累戰有功莊宗滅梁拜璋華  
州節度使在鎮多爲不法議者疑其有異志乃徙  
璋鎮昭義璋前任藩鎮陰爲異圖及受班行不愼  
行止乃停璋見任官勒還私第後賜自盡

張文蔚 字右華河間人也初以文行知名舉進士  
及第唐昭宗時爲翰林學士承旨是時天子微弱  
制度已隳文蔚居翰林制詔四方獨守大體昭宗  
遷洛拜中書侍郎同中書門下平章事柳燦殺裴



樞等七人蔓引朝士輒加誅殺縉紳相視以目皆不自保文蔚力講解之朝士多賴以全活

王令溫河間人後晉與契丹絕盟河北諸州皆驚時謂貝州水路之衝緩亟可以轉餉乃積芻粟數十萬以王令溫爲末清軍節度令溫部將邵珂素驕很難制令溫奪其職珂閒居無聊乃陰使人入契丹言貝州積粟多而無兵可守令溫以事朝京師心頗疑珂乃質其子崇範以自隨晉大臣以吳巒馳驛代令溫守貝州巒善撫士卒珂因求見

巒願自效巒推心信之開運元年正月契丹南寇圍貝州巒命珂守南門契丹圍三日四面亟攻之巒從城上投薪草焚其梯殆盡而珂自南門引契丹入巒卽投井死而令溫家屬爲契丹所掠帝憫之以令溫爲武勝軍節度使後累歷方鎮周顯德中卒

劉處讓字德謙滄州人也少爲張萬進親吏萬進

入梁爲泰寧軍節度使以處讓爲牙將萬進叛梁附晉梁遣劉鄩討之萬進遣處讓求救于晉晉王



方與梁相拒未能出兵處讓乃于軍門截耳訴曰  
萬進所以見圍者以附晉故也奈何不顧其亟苟  
不出兵願請死晉王壯之曰義士也爲之發兵未  
渡河而萬進爲梁兵所敗處讓因留事晉莊宗卽  
位爲客省使常使四方多稱旨累遷驍衛大將軍  
晉高祖立范延光反高祖以楊光遠爲招討使處  
讓叅其軍其後延光有降意而遲疑處讓譬以禍  
福延光乃降後晉爲樞密使凡所陳述多不稱旨  
繼丁母憂高祖遂不復拜樞密使以其印付中書  
而廢其職尋起復爲彰義軍節度使右金吾衛上  
將軍以疾卒累贈太師

李愚 字子晦無棣人也爲人謹重寡言好學爲古

文滄州節度使盧彥威以愚爲安陵主簿丁母憂  
解去後游關中劉秀述幽昭宗于東內愚以書說  
韓建使圖興復其言甚壯建不能用乃去之洛陽  
舉進士宏詞爲河南府參軍白馬之禍愚復去之  
山東與李延光相善延光以經術事梁末帝爲侍  
講數稱薦愚愚由此得名久之拜左拾遺崇政直



學士衡王友諒末帝兄也梁大臣李振等皆拜之  
獨愚長揖末帝以責愚曰衡王朕拜之卿獨揖可  
乎愚曰陛下以家人禮見之則拜宜也臣于王無  
所私豈宜妄有所屈坐言事忤旨罷爲鄧州觀察  
判官唐中宗滅梁愚朝京師唐諸公卿聞愚學古  
重之拜主客郎中翰林學士明宗卽位累遷中書  
侍郎同平章事愚爲相不治第宅借延賓館以居  
愚有疾明宗遣宦者視之見其敗簞敝席四壁蕭  
然明宗嗟嘆命以供帳物賜之至廢帝時兵革繁  
興而愚爲相欲依古以創理時以其迂濶不用清  
泰三年以疾卒

宋

周瑩 景城人右領軍衛上將軍景之子也景家富  
財好結交歷事唐漢周習水利嘗浚汴口導鄭州  
郭西水入中牟渠修滑州河堤累遷至是官太宗  
潛邸時瑩得給事左右卽位補殿直領武騎卒巡  
警泉福州卒纔數百捕劇賊千餘遷供奉官天雄  
軍節度

文



董全 河間人為夏津主簿以李斯小篆碑殘闕命  
 工礱石模刻庶為不朽之傳劉之美記之曰李斯  
 相秦坑儒虐民孰不非之然其書法之妙古今稱  
 最寧因其所短而廢其所長哉  
 劉翰 臨津人世業醫至翰而術更進為翰林醫官  
 著經用方書三十卷論候十卷行于世開寶中兩  
 奉詔同道士馬志討論本草

張知白 字用晦清池人幼篤學中進士第累遷河  
 南節度判官咸平時奏疏言當今要務真宗異之

召試舍人院權右正言獻鳳展箴疾薨禮官謝絳  
 議謚文節知白九歲其父終于邢州殯于佛寺及  
 契丹寇河北寺宇多頽廢殯不可辨知白既登第  
 徒行訪之得佛寺殿基恍然識其處既發其衣衾  
 皆可驗眾歎其誠孝嘗過陝州與通判孫何遇讀  
 道旁古碑凡數千言及還知白畧無所遺

劉摯 字莘老東光人兒時父居正課以書朝夕不  
 少間就學東平因家焉嘉祐中擢甲科歷冀州南  
 宮令摯與信都令李冲清河令黃莘皆以治行聞



人稱爲河朔三令終以直道愠于羣小卒死于貶  
士論寬之又摯教子孫先行實後文藝每日士當  
以器識爲先一號爲文人則無足觀矣

邢恕 字和叔莫人居實之父也少從程伊川學有  
識悟元祐初除御史中丞後謫隨州先與呂公希  
哲黃公履相友善後因希哲嘗從程氏學而明道  
先生及橫渠先生恒與之游恕論明道先生曰先  
生身益退位益卑名益高于天下蓋其所知上極  
堯舜三代之治其所以包涵博大悠遠纖悉上下

與天地同流至行師用兵戰陣之法皆造其極

李之純 字端伯無棣人登進士第熙寧中爲度支

判官江西轉運副使御史周尹劾廣西提點刑獄

許彥先受邑吏金命之純往究其端乃起於出婢

之口之純以爲蕪俚之言不治彥先得免徙成都

路轉運使成都歲發官米六千石損直與民言者

謂惠民損上詔下其議之純曰蜀郡恃此爲生奈

何一旦奪之事遂已累遷御史中丞建言朝廷事

下六部但隨省吏視其前後批以制緩急之序是



爲胥吏顛處命令也若大臣不暇省宜令列曹長  
貳隨其所承當行卽行當止卽止必稟而後決毋  
拘於文則吏不得舞權而下情達矣又言衆賢和  
於朝則萬物和於野燮理陰陽輔相之職間者國  
論稍虧雍睦言語播傳動繫觀望不可以不謹時  
董敦逸黃慶基論蘇軾托詞命以毀先帝蘇轍以  
名器私所親皆以監司罷之純疏其誣罔乃更黜  
之以疾改工部尚書紹聖中朝臣劾其阿附轍出  
知單州年七十五

李之儀 字端叔之純從弟也登第幾三十年乃從  
蘇轍於定州幕府歷樞密院編修官通判原州元  
符中監內香藥庫御史石豫言其常從蘇軾辟不  
可以任京官詔勒停徽宗初提舉河東常平坐爲  
范純仁遺表作行狀編管太平遂居姑熟久之徙  
唐州終朝請大夫之儀能爲文尤工尺牘軾謂人  
刀筆三昧號姑溪居士所著有姑溪集

龔夬 字彥和瀛州人清介自守有重名進士第三  
簽書河陽判官從曾布於瀛紹聖初擢監察御史



以親老求通判相州知洛州徽宗立召拜殿中侍御史始上殿卽抗疏請辨忠邪言者論其首尾建言詔削籍編管房州繼徙象又徙化徒步適貶所持扇乞錢以自給逢赦令得歸政和元年卒年五十五紹興間累贈右諫議大夫

劉甲 字師文其先東光人元祐宰相摯之後也父著爲成都漕幕葬龍遊因家焉嘉定七年卒於官年七十三甲幼孤多難母病割股以進生平常謂吾無他長惟足履實地畫所爲夜必書之名曰自

監

張凝 無棣人少有武勇侗儻自任鄉人趙氏予以材稱凝耻居其下因挾弓與角勝負約築土百步射之凝一發洞過矢激十許步抵大樹而止觀者嘆服節帥張美壯之召置帳下太宗在藩邸聞其名以隸親衛卽位補殿前指揮使淳化初領繡州刺史賜襲衣金帶每頒資必異等咸平初契丹南侵凝率所部兵設伏於瀛州西挺身陷敵明年契丹大至凝與范延召於莫州分據要害縱兵擊之



盡奪所掠生口遷趙州刺史轉靈州路安撫使又  
襲破慶州諸羌累功至高陽關部署因請老加殿  
前都虞候卒

劉遇 清池人少魁梧有膂力周祖鎮大名隸帳下

廣順初補控鶴都頭改副指揮使宋初遷御馬直  
指揮使累遷瓊州團練使從征太原以功遷虎捷  
右廂改領蔚州防禦使後征江南擢都指揮使吳  
兵三萬屯皖口遇會諸路兵破之金陵以平加領  
大同軍節度後改彰信軍節度征太原與史珪攻

城北面平之進攻范陽師還坐所部失律責授宿  
州觀察使後徙鎮滑州方對客足有灸痛醫謂火  
毒未去遇卽解衣取刀割瘡至骨曰火毒去矣談  
笑如常年六十六卒贈侍中

楊信 瀛州人初名義周顯德中隸太祖麾下爲神  
校宋初權內外馬步軍副都軍頭建隆二年領賀  
州刺史改鐵騎控鶴都指揮使遷殿前都虞候領  
漢州防禦使乾德初親郊爲儀仗都部署四年信  
病瘖上幸其第贈錢二百萬五年改靜江軍節度



開寶二年散指揮都知杜廷進等將爲不軌謀泄  
夜啓元武門召信逮捕遲明十九人皆獲上親訊  
而誅之六年遷殿前都指揮使改領建武軍節度  
太祖常令御龍舟習水戰於後池有鼓譟聲信居  
元武門外聞之遽入服皂褊袍以見上謂曰吾教  
水戰耳非有他也出上目送之謂左右曰真忠臣  
也卒年八十一錄其子承憲爲侍禁贊

盧懷忠

河間人少有膂力善騎射漢乾祐初寓居  
河中值李守貞之叛周祖圍其城懷忠夜踰城出

見陳攻取便益河中平奏補供奉官卒年四十九  
大中祥符四年錄其子熙爲校書郎

王繼升

阜城人性純質謹厚事太宗於藩邸太宗

信任之卽位補供奉官累遷軍器庫副使陳洪進  
來獻漳泉之地以繼升爲泉州兵馬都監會游洋  
洞民萬餘叛攻泉繼升潛率精騎二百擊破之擒  
其魁械送闕下餘黨悉平召還遷軍器庫使領順  
州刺史知諸道路發運事號爲稱職卒年六十四  
太宗頗嗟悼贈洋州觀察使葬事官給

王繼升

河間



索湘 字巨川鹽山人開寶六年進士釋褐鄆州司理叅軍齊州有大獄連逮者千五百人有司不能決湘受詔按鞠事隨以白太平興國四年轉運使和峴薦其能遷太僕寺丞克度支巡官改太子右贊善大夫轉殿中丞克推官拜監察御史知相州時有羣盜發西山下謀斷澶州河橋入攻磁相州授旗伐鼓白晝抄劫隣郡發兵千人捕之無敢近湘擇州軍得精銳三百乘其入境卽掩擊而盡擒之湘少文而長於吏事所至必廣儲蓄爲備預計出入軍旅間頗著能名卒詔遣其子希顏護喪傳置歸里

王昭遠 繼升子形質魁偉色黑繼升名之鐵山有膂力善騎射南遊京師事太宗於晉邸特被親遇常呼其小字及卽位補殿前指揮使稍遷都知從征太原先登爲流矢所中血漬甲縷戰益急會劉繼元降命守城門籍兵仗又從征范陽多所擒獲超散員指揮使移知河陽數月卒年五十六時車駕在大名爲廢朝贈太尉謚惠和中使護葬



田京 滄州人後徙居洛邑舉進士調蜀州司法叅  
軍累遷京西陝西轉運使嘗兩知滄州拜諫議大  
夫卒

皇甫繼明 蓀人父濟汾川令繼明身長七尺善騎  
射以膂力聞郡中刺史張廷翰以隸左右薦於太  
祖補殿前指揮使歷左右番押班都知太宗卽位  
累遷至捧日軍都指揮使領檀州刺史卒年六十  
三詔贈彰武軍節度遷其子懷信爲供奉官

張昭遠 字持正無棣人父凝殿前都虞候寧州防  
禦使契丹內寇凝與康保裔伏兵瀛州陷圍中昭  
遠年十六挺身掖出之擢左班殿直寄班祇候每  
出使還奏利害多稱旨爲忻州都巡檢改閣門祇  
候知火山軍管勾河東緣邊安撫司累遷知雄州  
會雨水陂塘大溢昭遠勒兵築長隄以捍其衝後  
改知成德軍遷四方館使滹沱河決壞城郭乃修  
五關城外環以隄民至今爲利擢知代州召還改  
莫州防禦使罷管軍授左龍武軍大將軍昭州防  
禦使卒特贈應州觀察使



張慤 字誠伯樂壽人登元祐六年進士第累遷龍圖閣學士計度都轉運使高宗為兵馬大元帥募諸道兵勤王慤飛輓踵道建議即元帥府印給鹽鈔以便商旅不閱旬得緡錢五十萬以佐軍高宗器重之命以便宜權大名尹兼北京留守馬步軍都總管慤初聞二帝北行率副總管顏岐等三上牋勸進遷尚書左丞官至中書侍郎慤善理財論錢穀利害猶指諸掌在朝諤諤有大臣節然議論可否不形於色未嘗失同列之歡卒謚忠穆上每

念之謂慤謀國盡忠遇事敢諫古之遺直也

邢希載 滄州進士希載上劉豫書乞通宋朝豫殺希載

吳及 字幾道靜海人第進士累大理丞時仁宗春

秋高無子及以其職上書言祖宗重民命蠲除煩苛陛下又深惻民隱親覽庶獄歷世用刑無本朝之平者宜天降之祥螽斯則百而未享繼嗣之慶者其無乃宦官大侈傷天地之和平書奏帝異其意欲召用以父憂去服闋擢秘閣校理踰月改右



正言疏請擇宗室子於服屬最親於人望賢者優之封爵選重厚樸茂之臣爲之輔聽入侍中禁他日嫡嗣誕生命歸邸於理無嫌於義爲順宗廟長久之策也兼管勾登聞檢院清汰冗兵省冗食除民疾苦十餘事多施用以日食三朝上疏云云久之遷右司諫以勤敏稱

張日用 靜海人知新昌縣文彥博宣撫河北日用謂彥博此行須得便宜行事請於上許之擒賊之功實日用叅贊之力也

權邦彥 字朝美河間人登崇寧四年太學上舍第調滄州教授入爲太學博士改宣教郎除國子司業宣和二年使遼明年抗表請帝臨雍爲學官積十餘年改都官郎中與王黼議不合鑄職改知冀州金人再入高宗開大元帥府起兩河兵衛汴京邦彥提所部兵二千五百人與宗澤自澶淵趣韋城據刀馬河諸道兵莫有進者會敵兵大至移屯南華二帝北遷邦彥與澤五表勸進建炎元年五月召還命知荆南府改東平府時東州半已入金

靜海

河間



至是圍益急邦彥誓以死守居數月城破猶力戰  
不已民義而從之突圍以出奔行在有司議失守  
罪將重坐之帝以其父母妻子皆沒於敵纔貶二  
秩俄除寶文閣直學士兼知江州本路制置使紹  
興二年除端明殿學士簽樞密院使尋兼權參知  
政事次年卒

張昭 河間人十歲誦書數十萬言及長博學經史  
太祖時拜吏部尚書嶺南平遣使就卧疾處問獻  
俘禮昭乃口占以對並有證據當時服其該洽

邢昺 鄭人應九經廷試日召至外殿講比師二卦  
又取羣經發題太宗嘉之擢上第真宗朝授翰林  
侍讀學士尋遷刑部尚書及卒真宗以官邸舊僚  
臨喪隕涕

胡旦 渤海人以狀元進身淳化間知制誥坐王繼  
恩累謫潯州平生好學雖居謫地著書不怠

賈黃中 字媯民南皮人唐相耽四世孫黃中幼聰  
悟方五歲父玘每旦必令正立展書六歲舉童子  
科七歲能屬文觸類賦咏十五舉進士授校書郎

任丘

河間

南皮



集賢校理遷著作佐郎直史館建隆三年遷左拾遺歷左補闕開寶八年通判定州判太常禮院黃中多識典故每詳定禮文損益得中號爲稱職嶺南平以黃中爲採訪使廉直平恕遠人便之還奏利害數十事皆稱旨會克江表選知宣州歲饑民多爲盜黃中出已俸造糜粥賴全活者以千數仍設法弭盜因悉解去太宗卽位遷禮部員外郎太平興國二年知昇州時金陵初附黃中爲政簡易部內甚治一日按行署中見一室扃鑰甚固命發視之得金寶數十櫃計直數百萬乃李氏宮閣中遺物也卽表上之上覽表謂侍臣曰非黃中廉恪則亡國之寶將汙法而害人矣賜錢三十萬特拜禮部侍郎代至兼秘書監子守謙雍熙二年進士守正獻文召試賜進士第後爲虞部員外郎守約國子博士守文殿中丞守訥右贊善大夫

張預 字公立東光人隱身不仕然好談孫吳法謂歷代將者所以有成有敗莫不與孫武書相券合因擇古之良將得百人集爲一書而以武之兵法



河間府志 卷之十四  
斷其後名曰百將傳上之于朝

李璘 河間人晉開運末契丹犯邊有陳友者乘亂殺璘父及家屬三人乾德初璘緣殿前散祇候友為軍小校相遇於京師璘手刃友而不去自言復父讐按鞫得實太祖壯而釋之

胡元興 滄州人母死負土成墳晝夜哭不絕聲州郡以聞詔旌其門賜以粟帛

李罕澄 阜城人七世同居漢乾祐三年詔改鄉里名及旌其閭太平興國六年復旌表之

鄭彥圭 順安軍人八世同居淳化六年詔旌表其門閭

崔諒 海州人七世同居郡守每延致之或親造其廬

遼 劉景 河間人好學能文積官翰林學士景宗雅知其忠實可用乃書其笏云劉景可為宰相尋兼侍中致仕子慎行為北府宰相時帝多卽宴飲行賞罰慎行諫止之

王樂德 居渤海以孝聞遼太祖平渤海封其子為



東丹王都遼陽樂德之曾孫繼遠仕爲翰林學士  
因遷家遼陽

夏行美 渤海人太平中大延琳叛時行美總渤海  
軍於保州延琳使人誘行美行美執之嬰城自守  
以功加同政事門下平章事錫賚甚厚累遷副部  
署致仕

大康義 渤海人開泰間累官南府宰相出知黃龍  
府善於綏撫東部懷服常言蒲蘆毛朶界多渤海  
人乞取之詔從其請康義領兵至大石河馳準城  
掠數百口以歸

高模翰 一名松渤海人善騎射遼太祖知其才委  
以心腹立晉之功模翰第一

金高竑 海人以蔭補官調貴德縣尉遷安州刺  
史知河南府充安撫使同知大名府所至皆有政  
蹟後爲河北西路按察轉運使

劉完素 字守真河間人少好醫術後遇老人自言  
陳希癸飲以椽醞醉而醒大有開悟遂精於術嘗  
撰運氣要論宣明論素問元機又約內經病機十



九條著原病式而舉二百八十八字以盡醫之變  
及為習醫要論直格書三卷行之金三聘不起賜  
號高尚先生說者以完素要旨論原病式作而內  
經之理昭如日月直格書宣明論作而長沙之法  
約如樞機則河間為尤有功云

師安石 字子安清州人本姓尹氏避國諱更焉承  
安五年詞賦進士為人輕財尚義初補尚書省令  
史適宣宗南遷留平章完顏承暉守燕都承暉就  
死以遺衆托安石使赴行在安石間道走汴以聞

上嘉之擢為樞密院經歷官元光二年累遷御史  
中丞上章言備禦二事上嘉納之繼坐劾英王守  
純附奏不實決杖追官哀宗即位擢為同簽樞密  
院事累進尚書右丞論列近侍張文壽等上怒甚  
有旨切責安石驟蒙任用遽遭摧折疽發腦而死  
上甚悼惜之

張開 景州人自至寧末兵起開團結鄉兵為固守  
累功遙授同知清州防禦使兼同知觀州事貞祐  
四年開率所部復取河間府及滄獻二州十有三

景州



縣開有宣撫司留付空名宣勅二百道奏乞從權  
署置就任所復州縣舊官闕者補之興定元年遙  
授澤州刺史四年封上黨公

齊礪 字公望伯顏之子任丘人襲大父某河間郡

爵首除禮儀院太祝遷太樂署丞出宰杭之於潛  
能政治民爲人雅度舒徐易闇而彰決滯而通廉  
而能勤正而不苛一新其政明年化行訟簡民用  
饒足誅鋤強梗豪俠歛跡

許古 字道真清州人汾陽軍節度使安仁子也登  
明昌五年詞賦進士第貞祐初自左拾遺拜監察  
御史時宣宗遷汴信任丞相高琪無恢復之謀古  
上章辭極忠愛多所建言皆切中時病有古諫臣  
之風焉宣宗知其爲直而不用其言

烏古論榮祖 本名福興河間人明昌二年進士歷  
官補尚書省令史除都轉運司都勾判官轉弘文  
校理陞中都總管府判官除振武軍節度副使彰  
德府司馬累遷戶部員外郎寧海州刺史貞祐二  
年城破榮祖猶力戰死之贈安武軍節度使謚毅



勇

陳尚 字和之滄州人大安元年進士天興間爲右司諫遇事輒言無少隱上嘗面獎及汴被兵屢上封事言得失請戰一書尤爲剴切其畧云今日之事皆出陛下不斷將相怯懦若因循不決一旦無如之何恐君臣相對泣涕而已而赤盞含喜等沮其策不行識者惜焉

孫鐸 字振之其先滕州人徙恩州歷亭縣鐸性敏好學遼陽王遵古一見器之期以公輔登大定十三年進士調海州軍士判官衛縣丞補尙書省令史章宗爲右丞相語人曰治官事如孫鐸必無錯失初卽位除鐸同知登聞檢院事累遷尙書左丞以議鈔法忤旨徙絳陽軍宣宗遷汴鐸上謁於宜村除太子太師有疾累遣使候問貞祐三年致仕是歲薨

許安仁 字子靜獻州交河人幼孤能自刻苦讀書善屬文登大定七年進士第調河間縣主簿累遷太常博士兼國史編修官章宗爲皇太孫安仁以



講學被選累遷至翰林修撰同知制誥賈鉉以安  
仁守道端慤薦于朝路伯達稱其立已純正宜加  
顯任超擢禮部郎中兼右補闕出爲澤州刺史作  
無隱論上之凡十篇後陞汾陽軍節度使致仕泰  
和四年卒年七十七謚日文簡安仁質實無華澹  
然有古君子風故爲時人所稱云

麻九疇

字知幾莫州人三歲識字七歲能草書作

大字有神童之目章宗召見問汝入宮殿亦懼否  
對曰君臣父子也子寧懼父耶上大奇之弱冠在

太學有聲場屋間南渡後讀書北陽山始以古學  
自力博通五經於易春秋爲尤長少有惡疾就道  
士學服氣疾乃平又精於醫凡飢寒勞苦人不能  
堪者處之怡然不以累其學也興定末試輒高等  
以脫誤下第才名籍甚牛童馬卒亦能舉其姓名  
正大三年右相侯蕭公趙禮部交薦可試館職乃  
賜盧亞榜第二甲第一人及第授太祝權太常博  
士應翰林文字然資性野逸高蹇自便與人交一  
語不相入則徑去自度終不能諧世遂謝病歸作



詩工於賦物精深峭刻類其爲人一時名重天下  
壬辰歲遇亂卒年五十平山常仲明之子德葬之  
小商橋旁近趙庄見州集今有墓在莫州北門外  
未知孰是

田紫芝 字德秀滄州人父齊爲部掾芝少孤鞠於  
外氏家外祖使賦麗華引語意警絕資性穎悟一  
覽莫遺年二十讀經傳子史殆遍爲人踈秀而以  
蘊藉見稱與同郡王元卿齊名貞祐初避兵臺山  
遇遊騎見害有詩集行於世

元

李載 河間人至元初以戶部員外郎遷南陽太守  
北代人立碑頌德

程思溫 瀛東人及其從弟思忠元好問嘗以爲天  
民之秀有用於世者也遂薦於邪律丞相

楊禮 滄州人至治間知本州有惠政解任民爲立  
碑

劉正 字清卿清州人也年十五知讀書習吏事初  
辟制國用使司令史遷尚書至元八年罷諸路轉



運司立局考核逋欠正掌其事大都運司負課銀五百四十七錠逮繫倪運使等四人正察其寃遍閱吏牘得李介甫領銀契七紙適合其數驗其字畫皆司庫辛得柔所書遂白尚書捕鞠之悉得課銀辛伏辜而四人得釋正由是知名轉樞密院令史累遷至左司員外郎謁告歸旋以黨于阿合馬傳旨捕正械繫於拱衛司火魯霍孫曰上嘗謂劉正衣白衣行炭穴中十年可謂廉潔者乃免其罪陞參議樞密院事累遷左承行省江浙武宗卽位

召爲中書左丞後懇辭還家仁宗卽位召議國事正詣闕言八事集議行之仁宗初政風動天下正與諸老臣陳贊之力居多後拜榮祿大夫平章政事議中書省事延祐六年卒贈宣力贊治功臣光祿大夫司徒柱國趙國公謚忠宣

劉濟 字仲源肅寧人以江東場管勾累調婺州路司獄斷訟明決不避權貴屢出疑獄辨活及所從遣者不可勝計延祐初以平反庶獄超陞江浙行中書省左右司都事卒

劉濟



陳顥 字仲明其先居盧龍仕金爲謀克監軍太祖  
得之以爲平陽等路軍民都元帥子孫徙清州遂  
爲清州人顥幼穎悟日誦百千言稍長游京師登  
翰林承旨王磐安藏之門磐熟金典章安藏通諸  
國語顥兼習之

張之賢 字世英躬耕養親樵采以供甘旨間從師  
授書通其大義父嘗疾思生鯉以居在平陸莫能  
致夜冒寒走二百里得之以歸縣以其孝欲署爲  
吏不就

榮溥 河間人嘗事哈撒丞相丞相旣得罪衆皆散  
去榮獨收其屍以葬又上疏白其寃得復封爵後  
官至四品貢尚書師泰嘗賦詩贈之稱其節義

夏大亨 字巨卿河間人至元間宰亳州譙縣平反  
寃獄長史劉傑嘉其行誼爲立碑於福寧鎮

魏秉彜 交河人至元中爲魯山尹勤明廉儉先是  
各省憲移檄河南府路爭理嵩汝二州盧氏葉邲  
魯山等縣秉彜詢得其情上疏力言省憲嘉之遂  
寢其事復廟學西鄰侵地修治鴉路險阻禱雨祈



河間府志 卷之十四  
晴皆應及代去民懷其惠爲立石紀之

張榮 清州人後徙鄆陵歲甲戌從金太保明安降  
太祖賜虎符授懷遠大將軍元帥左都監乙亥正  
月奉旨畧東平益都諸郡戊寅領軍匠從太祖征  
西域諸國莫蘭河不能涉太祖召問濟河之策榮  
請造舟太祖復問舟卒難成濟時當在何時榮請  
以一月爲期乃督工匠造船百餘艘遂濟河太祖  
嘉其功賜明元速赤癸未七月陞鎮國上將軍砲  
水手元帥甲申七月從征河西乙酉從征關西五

路十月攻鳳翔砲傷右髀帝命賜銀三十錠養於  
雲內州庚寅七月卒

王昌齡 字顯之滄州人幼負奇節貞祐初滄景被  
兵因走汴累以才幹辟爲元帥府經歷陳州防禦  
推官至大末丞相史天澤撫鎮河朔復起爲參議  
真定五官萬戶府事累立戰功又留守光州撫新  
附安反側聿有成績時以衛當四達之衝難其守  
特以昌齡領其事不一歲興學勸農兵民宴然卒  
葬汲縣衛人感其惠送喪者萬人又相與立祠以



祀之子復字子初有器量通經史少從昌齡參議  
軍府事父沒又代領州事進朝請大夫又改倅新  
德府入為中書省郎中又以中書舍人出知歸德  
府所至皆有政蹟進河南道宣慰副使累進行臺  
御史中丞改河東山西道卒

劉沂 河間人至元間宰襄垣縣涖政不猛撫字有  
方且有文名人以文章政事兩全目之

王居仁 河間人延祐中尹涉縣城東北隅歲為山  
水圯壞民不寧居居仁設法築堤患乃息去任民

不忍釋刻石頌德

李京 字景山河間人為烏撒烏蒙道宣慰副使會  
郡蠻不靖京按行調發盡心綏撫周履雲南所著  
有雲南志及鳩巢集

王欽禮

字子敬任丘人

詳見仕籍志

賈德 景州人貞祐初燕不能都河朔盜起州將材  
德且為眾所推自白衣署德為故城縣丞專徼巡  
事於是設方略窮根株破機牙擒捕招諭不數月  
寇難盪平尋金兵入中夏太師國王營屯彌亘原



野元州將舉城降無幾宋將李全乘隙西畧州遂  
爲全所取太師聞變赫怒將爲屠城之舉德間行  
請命太師察其忠誠許其請闔城賴以全活太師  
承制拜德定遠大將軍隨進景州節度使至元十  
一年卒年八十有三子男十八人孫四十九人多

列貴顯

岳元鎮 古蓀人涉獵書史氣渾厚志雄邁處家御  
衆有法父雯自國初仡仡効勞任景獻陵三州判  
官至北京錄事而終元鎮應募從戎戎帥以其父

克勤王事俾長百夫從攻江陵拔砮矢中股從攻  
樊城先登矢中頰從攻漢陽鄂州俱有功年六十  
八致仕

郝偁 字子榮宰天長縣政孚聲著廢舉治興聿新  
廟學絃誦相聞世籍河間祖企亞中大夫異樣局  
總管父克敬河南路總管

張君佐 清州人至元十二年爲安慶府安撫司達  
魯花赤十四年春賊將攻安慶君佐察知之時城  
中軍僅數百君佐命扼賊出沒要道賊不敢犯乃



寇黃州行省命君佐率衆復黃州因以爲黃州達魯花赤

鄭義 河間人也初侍太宗佩金符山東路都元帥兼景州軍民人匠長官從伐金與敵戰於歸德死之弟德溫襲從攻徐州陷陣而死子澤襲從萬戶史天澤出征多立戰功年老弟江代其職世祖北征賜金符授侍衛親軍副都指揮使判武衛軍事兼景州軍民人匠長官中統三年李壇據濟南叛世祖令各州縣長官子弟充千戶於是以江子郇

爲千戶領景州新簽軍千餘敗賊衆於王馬橋諸王哈必赤賞銀五十兩壇平郇以例罷江陞爲武衛親軍都指揮使賜虎符尋改屬左衛至元八年從攻襄陽沒於陣郇襲其職

劉遵 河間人有異才爲詩文多不經人道語游京師無知者嘗作採蕙詞以見學士元明善明善大驚曰他日當避此位御史中丞張養浩亦善之爲延譽諸公間得濟南學錄未上卒

魏禮 肅寧人字廷訓至正庚子狀元是年春五色



卷之十四  
雲見占者謂得名士元凶被徵爲修撰歷官禮部  
侍郎前公

劉世賢 字希孟東光人宋丞相摯九世孫世習琴  
遂以琴名浙右爲人端重持論正大絕意仕進游  
松江與曹知白善因家於松卒葬湖州

劉伯容 東光人號石田隱士宋丞相摯之裔也性  
純孝嘗有術者推其父壽不永因嗚咽辛楚每日  
雞鳴而起率弟仲禮望斗跪祝願自減以益父如  
是三十年父年七十六而終





